

2 Coodintoidi inänite **Pabodo cadota ante ayænta nänö yewæmongainta**

Waa quëwencæminimpa, ante

¹ Wængonguï pönö angä beyæ Itota Codito botö Pabodobo imote da godongä godongaïmo inte botö mönö töninäcä Timoteo tönö guëa apænemöna ate botö iïmaï ante yewæmömopa. Coodinto iïnömö quëwëmini inte minitö iïnömö Codito ingante mini godongämæ pönencabo incæ acæminimpa, ante yewæmömopa. Ayæ Acayabæ tömäo iïnömö quëwente Wængonguï quinäni inte tömënanï adobaï adota acædänimpa, ante yewæmömopa. ² Mönö Awënë Itota Codito tönö Mæmpo Wængonguï tönö guëa waadete pönö cæda adinque minitö gänë pönente waa quëwencæminimpa, ämönapa, ante yewæmömopa.

Codito iïmaï waadete pönö cæcampa, ante

³ Mönö Awënë Itota Codito Wæmpocä iïnongante Itota iïnömö adocä ingante, Botö Wængonguï inongä ingampa. Ayæ Itota Wængonguï adocä inongä inte tömengä mönö wæwënö ante adinque godongämæ wæte bai pönö waadete apænecä ëñëninque mönö wampo pönëmö imompa. Mänömaï beyæ, Itota Mæmpo Wængonguï cöwë waa cæcampa, ante mönö watapæ apænecæimpa. ⁴ Adocä Wængonguï mönö imonte äninque, Wënæ wënæ wæwëmini adinque botö waadete pönö apænebo ëñëninque minitö wampo pönëminitapa. İninque wadäni wënæ wënæ

wæwënäni adinque mīnitō botō apænedō ante waadete godō apænemīni ēñēninque tōmēnāni wæætē wampo pōnencædānimpa, ante botō mīnitō imīnite pōnō cætabopa, Wængonguī angampa.

⁵ Edæ iūmaī beyæ mǎnōmaī angampa. Codito nē nantate wægaingā beyæ nantate wæwēninque mōnō tōmengā tōnō āanque bai nantate wæwēmōmpa. Ayæ adobaī nantate wæwēmō adinque adocā Codito waadete pōnō apænecā ēñēninque mōnō tōmengā tōnō āanque bai ēwocadinque wampo pōnēmōmpa. ⁶ Mōnitō nantate wæwēmōni amīnitawo. Edæ mōnitō nantate wæwente apænemōni beyæ Wængonguī mīnitō imīnite wæætē pōnō waadete apænecampa. Apænecā ēñēninque mīnitō wæætē wampo pōnēninque wænāmaī quēwencæmīnimpa, ante Wængonguī cæcampa. Ayæ mōnitō wæwēñmōnite tōmengā pōnō waadete apænecā ēñente wampo pōnēmōni amīnitawo. Edæ mīnitō nantate wæwēmīni inte wampo pōnencæmīnimpa, ante Wængonguī mǎnōmaī cæcampa. Ayæ wampo pōnēmīni badinque mīnitō iincayæ ate mōnitō nantate wæwēnō bai adobaī nantate wæwēmīni incæte piyænē cæte ee cæte quēwencæmīnimpa, ante Wængonguī pōnō cæcampa. ⁷ Ayæ mōnitō tōnō āanque bai mīnitō nantate wæwēmīnitawo. Edæ tōmengā waadete pōnō apænecā ēñēmīni ate mīnitō adobaī mōnitō tōnō āanque bai wampo pōnenguīmīni imīnipa. Ante do ēñēninque mōnitō, Nāwangā mīnitō watapæ quēwencæmīnimpa, ante do pōnēmōnipa.

⁸ Iñānāni, mōnitō Atiabæ quēwēninque æbānō wēnæ wēnæ bate wætamōnii, ante ñōwo

yewæmōmo aedāni. Tæi piñæmōni ināmaī inte mōnitō godōmenque teēmē mongænte bai nanguī wænæ wænæ bate wædinque, Nangæ bate wængui wæ, ante wætamōnipa. ⁹ Wængongui do angā wænguēnēmōni imōnipa, ante nāmāneque pōnente wætamōnipa. Incæte mōnitō, Tōmēmōni nāmā tæi piñænō beyænque quēwencæmōnimpa, ante pōnēnāmaī incæmōnimpa, ante odōmoncæte ante Wængongui pōnō cæcā wætamōnipa. Wæætē tōmengā, Do wængaināni quēwencædānimpa, ante botō nē āmo iñōmote mīnitō wæætē botō imote wede pōnente quēwencæmīnimpa, ante cæcæte ante Wængongui mănōmaī pōnō cæcā wætamōnipa. ¹⁰ Mōnitō măninō mōni oo wænguinque ante wæyōmōnite tōmengā do bæi ongonte ængā beyænque quēwentamōnipa. Ayæ ate wæyōmōnite tōmengā ængā beyænque quēwencæmōnimpa. Ayæ, Adocā wæætē wæætē ængā beyænque quēwencæmōnimpa, ante pōnēninque mōnitō tōmengā ingante wede pōnente tomōnipa. ¹¹ Ininque mīnitō iñacabo gongænte bai mōnitō beyæ Wængongui ingante apænemīni eñēninque tōmengā cōwē bæi ongonte ængā beyænque quēwencæmōnimpa. Mănōmaī cæcā adinque nanguī ināni wæætē Wængongui ingante waa ate pōnente iīmaī ante apænecædānimpa. Wængongui eñēmi. Nanguī ināni apænedāni eñēninque bitō Pabodoidi beyæ pōnō waa cæbi amōnipa, ante apænequināni inānipa.

Coodinto iñōmō quīnante pōnāmaī imōi, Pabodo angampa

12 Mönitö iimaï ante nämä waa ate pönëninque apænemönipa. Wængongui quimöni inömöni inte mönitö tömengä, Tæiyæ waëmö ewocacæminimpa, ante ænte entawëmönipa. Mänömaï beyæ Wængongui nö cæcä bai mönitö adobai inguipoga quëwëninque nö cæte quëwëmönipa. Ayæ minitö weca pöninque mönitö godömenque waa cætamönipa. Mänömaï cædinque mönitö inguipoga quëwënänique nani ëñënö beyænque dicæ cætamöniyaa. Wæætë mimö entawëmöni inte nämä apænte äninque mönitö Wængongui waadete pönö apænecä ëñëninque eyepæ cætamönipa, ante tomönipa. 13 Minitö acæminimpa, ante yewæmöninque mönitö dicæ idiquibæ ante yewæmömöniyaa. Wæætë, Edonque adinque do ëñencæminimpa, ante edonque yewæmömöni abaïminipa. Ayæ botö, Minitö näwangä godömenque ëñencæminimpa, ante iimaï ante pönëmopa. 14 Mönitö æbänö imönii, ante minitö pancaa ante do ëñëmïnipa. Ayæ, Mönö Awënë Itota tömengä nänö ponguïönæ iinque bayonte mönitö minitö iminite adinque, Minitö në wede pönengaimïni imïnipa, ante adinque tocæmönimpa, ante do ëñëmïnitawo. Ayæ mäniönæ bayonte mönitö imönite adinque minitö adobai, Waa në cægaimïni imïnipa, ante tocæminimpa, ante ämo ëñëmaïminipa.

15 Mänömaï impa, ante pönëninque botö, iimaï cæcæboimpa, ante pönentabopa. Wayömö ayæ godämaï inte botö täno minitö weca ponte waadete apænecæboimpa. Apænebo ëñëninque minitö wæætë mempoga tocæminimpa, ante iimaï cædimö intabopa. 16 Minitö weca täno ponte ëñadinque godömenque godinque botö Mäatedöniabæ gote

pöninque wæætē mīnitō weca adodō ocæ ēmænte poncæ cædīmo intabopa. Ayæ pōmo ate mīnitō botō īmote godongāmæ cædinque da godōmīni godōmenque Oodeabæ gocæ cædīmo intabopa. ¹⁷ Incæte botō, Mänōmaī cæquīmo īmopa, ante pönēninque dicæ ōnonque ante pönentawogaa. Mänōmaī pöinēmo inte botō ñimpo cæte pönāmaī imo adinque mīnitō, Pabodo æmæ pönente, Wīi pöinente wabānō wīi pongā, ante pönēmīnitawo. Īñæmpa inguipogaque quēwēnāni mänōmainō ante nāni æmæ pönēnō baī botō ĩñōmō edæ dicæ adobaī pönentawogaa.

¹⁸ Wængonguī nāwangā mōnō īmonte cōwē pönēninque nē aacā ingampa, ante nō pōnī impa. Mänōmainō ante nō pōnī ī baī mīnitō ĩmīnite mōnitō apænedō ĩñōmō adobaī nō pōnī impa. Īninque mōnitō ædō cæte wadō ante apænequīmōnīi. ¹⁹ Tidibānō tōnō Tīmoteo botō tōnō mīnitō weca pōninque, Wængonguī Wengā Itota Codito ingampa, ante nō impa, ante apænemōni ēñēmīnitawo. Īninque mōnitō Itota Codito nempo quēwēninque nē Ao āmōni inte ædō cæte æmæ pönente baī wadō ante apænequīmōnīi. ²⁰ Īīmaī impa. Wængonguī, Cōwē cæcæboimpa, ante æpogamē wæætē wæætē angacāimpa. Wæætē wæætē angā incæte Codito ĩñōmō edæ cōwē Ao āninque, Wængonguī nānō angāinō tōmānō ĩnque cæcæimpa, ante cæcampa. Īninque mōnitō tōmengā tōnō cædinque, Wængonguī ñāō apāite baī emōñongante tōmānāni tōmengā ingante waa acædānimpā, ante cædinque, Ao, mänōmaī impa, ante, Amēē, ante watapæ

apænemönipa. ²¹ Wængonguï incæ mönitö imönite apænte æninque ayæ mīnitö imīnite apænte æninque, Mīnitö Codito nempo quēwēninque nē tæi pīñæmīni bacæmīnīmpa, ante mönō tōmāmō imonte pōnō öni pæte bai cædinque iīmaï cæcampa. ²² Tömengä emōwo yewæmōnte bai cædinque, Botö quimīni imīnīpa, ante pōnō cæcampa. Ayæ, İncayæ ate mīni godōmenque nanguï ænguinque mīnitö ñōwo botö Önōwoca ingante ænte ewocædāni, ante tōmengä Önōwoca ingante ñōwo da pōnongä ænte ewocamīnīpa.

²³ İninque Coodinto iñömö botö quīnante wæætē pōnāmaï ingaboï. Edæ wēnæ wēnæ cæmīni adinque mīnitö imīnite nē panguēnēmo incæ botö, Wīi pāinente awædö, ante wīi pontabopa. Wængonguï ayongante botö, Mänōmaï impa, ante nō apænebo eññæmīmīnīpa. ²⁴ İmaï ante wede pōnencæmīnīmpa, ante mönitö dicæ nē wææ ämōni imōniyaa. Wæætē edæ, Mīnitö mīni wede pōnēnō beyænque tæi ongōninque edæ nanguï cæmīnīpa, ante adinque mönitö wæætē, Mīnitö watapæ tocæmīnīmpa, ante cædinque mīnitö tōnō godongāmæ cæmōnīpa.

2

¹ Botö wēenēñedē mīnitö weca eñacæ pōninque nanguï ämo wæmīnitapa. İninque, Wīi wæætē ämo wæcæmīnīmpa, ante ñōwo eñacæ pōnāmaï incæboimpa, ante nāmāneque pōnēninque antabopa. ² Edæ pīimo wæwēmīni bai æcānō wæætē, Tocæbiimpa, ante botö imote waadete pōnente apænequēnengää. İñæmpa botö pīimo

beyæ nē wæwēnīmīnique ongōmīni bai botō imote nē waadete pōnente apænequēnengā iñōmō edæ dæ ancædongäimpa. ³ Botō quiēmē beyæ tobo adīnque mīnitō godongāmæ watapæ toquēnēmīni imīnīpa, ante pōnentabopa. Mīnitō botō beyæ äninque, Pabodo mōnō weca pongā adīnque mōnō cæmō tocæcäimpa, ante nē cæquēnēmīni imīnīpa, ante awædō. İninque, Mīnitō weca pōninque botō mīnitō wæwēnō ante wædāmaī incæboimpa, ante cædīnque botō, Botō cadota ante yewæmōmo adīnque mīnitō ēñente cæcæmīnīpa, ante wæbopa. ⁴ Botō nanguī caate wædōmo inte mīmōnoque pōnente wæwēnīnique yabæque adobaī Ca ca nanguī pōnente wædīnque mänōmaīnō ante wæbopa. Incæte botō, Mīnitō wæwencæmīnīpa, ante dicæ ämogaa. Wæætē, Botō æbänō mīnitō imīnite nanguī waadete pōnēmopa, ante ēñencæmīnīpa, ante odōmoncæte ante yewæmōmopa.

Nē wīwa cæcä ingante æbänō godō waadete ñimpo cæquī

⁵ Adocanque wīwa cæcä adīnque botō tōmengä nänō wīwa cædō beyæ wæwēmo incæte mīnitō tōmāmīni wædænque incæ nanguī incæ wæwēmīni adobaī imīnīpa. Botō, Tōmengä ingante pīnāmaī incæboimpa, ante pōnēninque, Wædænque wæwēmīnīpa, ante apænebopa. ⁶ Nē ēñēnāmaī cædingä ingante mīnitō pancamīniya wodo tōmāmīni do pāmīnitapa. İninque botō, Idæwaa pāmīnīpa, ämopa. ⁷ Tōmengä, Ancaa pāmīni awædō, ante godōmenque wæwente bacantawo. İninque mīnitō pōnō ñimpo cædīnque tōmengä ingante,

Idæwaa pāmōni wæbipa, ante ædæmō waadete apænemīni ēñēninque tōmengā īinque wædinque wampo pōnencæcāimpa. ⁸ Mīnitō wæætē, Bitō īmite nāwangā waadete pōnēmōnīpa, ante adodō apænemīni ēñencæcāimpa, ante botō mīnitō īmīnite nanguī āmopa. ⁹ Botō ānō ante æbānō tōmānō ante ēñente cæmīnī, ante ēñencæte ante botō wēēnēñedē yewæmontabopa. Eyepæ cæmīni ate wædinque botō, Eyepæ cæmīnīpa, āmopa. ¹⁰ Nē ēñēnāmaī cæcā ingante mīnitō ñimpo cæmīni ee gocantawo. Mānōmaī cæmīni īinque botō ñōwo adobaī ñimpo cæbopa. Waocā æcāmenque ēñēnāmaī cæcā adinque godō pōnō ñimpo cæbo īinque botō Codito ayongante mīnitō beyænque ante mānōmaī godō ñimpo cæbo intabopa. ¹¹ Īñæmpa Tatāna incæ angā ēñente beyænque mōnō oda cæte wæquinque edæ godōmenque pīīmāimompa, ante aquēnē quēwēedāni. Tatāna æbānō, Oda cæte wæcædānīpa, ante cæcampa, ante edæ do ēñēmompa.

Tito beyæ ante Pabodo wæcampa

¹² Botō Todoa nāni quēwēñōmō tāno pōninque, Mōnō Codito ingantedō ante watapæ apænecæte ante cæyōmo mōnō Awēnē, Botō beyæ guite apænee, ante odemō wi ænete baī do cæcā atabopa. ¹³ Incæte botō tōññacā Tito dæ angā wædinque botō, Ædō cæte īñōmō a ongonte apænequīmoo, ante tōmēnāni īnānite, Gobopa, ante Māatedōniabæ gocæte ante wadæ gotabopa.

Codito nempo quēwēninque tæī ēmōmōnīpa, ante

¹⁴ Nē tæī ēmongā inte mōnō Codito īñōmō nē pīinte cædāni īnānite gānā cæcampa. Īinque

mönitö Codito nempo quëwëñömönite Wængonguï, Në tæï ëmongä ingante waa acædänimpa, ante cædinque mönitö imönite në tæï ëmongä miñæ ænte mäocä dao dao godinque mönitö tömengä nänö ëmönö bai adobai tæï ëmömönipa. Ayæ oguï wa woboyæ wodo wodo cædinque tömäo mäo oguï wa bai Wængonguï adobai cædinque mönitö imönite angä ëñëninque mönitö wæætë, Mönö Codito æbänö ingää, ante wayömö wayömö mäo apænemöni ëñënanipa. Wængonguï mänömai cæcä beyæ mönö Wængonguï ingante waa ate pönëninque apænecæimpa.

¹⁵ Iïmai edæ impa. Codito ængä beyænque në quëwenguïnäni weca quëwëmöni incæ në wænguinäni weca quëwëmöni incæ mönitö Codito nempo quëwëninque tömengä nänö oguï wamönedö bai mönitö adobai, Wængonguï wë ongonte bai tocæcäimpa, ante oguï wamönete bai apænemönipa. ¹⁶ Mönitö öö wa wamönete bai cædinque në wænguinäni inänite tömënäni nani wænguimämo ante apænemöni ëñëninque tömënäni nani wænguinque wë ongonte ocado cæte bai ëñënanipa. Wæætë oguï wamönete bai mönitö në quëwenguïnäni inänite guiquënë tömënäni nani quëwenguimämo ante apænemöni ëñëninque tömënäni wæætë nani quëwenguinque wë ongonte ocado cæte bai ëñënanipa.

Iinque mäninö mönitö cæquënëno ante æcänö eyepæ cæquingää. ¹⁷ Edæ nanguï inäni nämä beyænque ante æncæte ante cædinque Wængonguï nänö apænedö ante apænewënäni bai mönitö wii adobai wënæ wënæ cæcæte ante apænemöni

imönipa. Wæætē Wængonguī mōnitō imōnite da godongā godinque māo nē apænemōni inte mōnitō Wængonguī ayongā mōnō Codito nempo quēwēninque nō pōnente apænemōnipa.

3

Wængonguī mūine pōnō angā beyænque quēwēmōmpa

¹ Mōnitō imōnitedō ante pōnēninque mīnitō, Pabodoidi, Waa cæmōni aedāni, ante tedewēnānipa, ante wēēnēñedē āmīnitawo. Ayæ, Nōwo wæætē adodō ante tedewēnānipa, ante pīimīnitawo. Mōnitō iñæmpa nāmanque ante, Waa cæmōni aedāni, ante dicæ āmōniyaa. Wadāni mōnitō imōnite waa acædānimpa, ante cædinque pancadāniya guiquēnē mīnitō imīnite āninque, Cadota ante pōnō yewæmōedāni, ānāni ēñēninque yewæmōmīni ate tōmēnāni ænte māo odōmōnāni adānipa. Ayæ wadāni inānite adobai, Cadota, ānāni ēñente yewæmōnāni æninque mīnitō imīnite odōmōnānipa. Mōnitō guiquēnē, Cadota ante pōnō yewæmōedāni, ante dicæ āmōniyaa. ² Wæætē mīnitō guiquēnē waa quēwēmīni adinque wadāni, Pabodoidi tōmēnāni inānite apænedāni beyænque coodintoidi wede pōnēnāni inte waa quēwēnāni amōnipa, ante pōnēninque cadota ate bai do ēñēnānipa. Mānōmaī pōnō cæmīni æninque mōnitō cadota næænte odōmonte bai cædinque, Coodintoidi æbānō waa cædānii, ante tōmānāni inānite odōmōmōni adinque ēñēnānipa. ³ Īninque, Pabodoidi apænedāni beyænque waa cædānipa, ante edonque acædānimpa, ante cædinque Codito

iñömö Wængonguï nē Quēwengä Öñowoca ingante da pönongä ænte ēwocamīnīpa. Mänömaï cædinque Codito cadota ante yewæmonte bai pönö cædinque wīi tōmengonca yewæmongampa. Wīi dicaboga yewæmōninque tōmengä Öñowoca ingante mīnitō baonga da pönongä ænte ēwocamīnīpa.

⁴ Codito godongāmæ cæcä beyænque mōnitō Wængonguï ayongä nöingä ante apænemōnīpa, ante pönēninque mōnitō guīññenedāmaï inte do edæ apænemōnīpa. ⁵ Mōnitō nāmanque ante, Æbänö waa cæmōnīi, ante eyepæ ïmōnīpa diyæ apænte anguimōnīi. Wæætē Wængonguinque pönö godongāmæ cæcä ate mōnitō eyepæ badinque cæmōnīpa. ⁶ Wængonguï, Botö pönö cæbo ate mīnitō Ao ämīni ïninque mōnö godongāmæ waa cæte quēwengæimpa, ante cōwē angampa. Tōmengä doyedē iñömö, Botö wææ angainö ante ēñente cædinque quēwencæmīnīpa, ante nänö wææ angaine ante ñöwo wæætē änāmaï ingampa. Mänīne ante ñöwo ganca wææ angä bai mōnö wænguinque incædōnīpa. Ñöwo guiquēnē Wængonguï wæætē, Botö Öñowoca ingante ænte ēwocadinque quēwencæmīnīpa, ante mīine ante apænecä ēñēninque mōnö quēwenguinque Wængonguï Öñowoca ingante ænte ēwocamōmpa edæ. Mōnitō iñömö tōmengä Öñowoca ingante nē ēwocamōni inte eyepæ badinque mīine Wængonguï ñöwo nänö pönö apænede ante nē apænemōni ïmōnīpa.

⁷ Wængonguï, ïmaï cæedāni, ante dicaboga wææ yewæmongä ate mōnö ēñēnāmaï ïmö beyænque mänīne tōmengä nänö wææ yewæmongaine

beyænque mönō wænguimämo bagatimpa. Incæte mänine beyæ edæ ñäo nanguï apäigatimpa. Ìninqe mänine ænte godömenque wææ äninque Möitee wodi awinca ñäo apäite bai ëmongacäimpa. Mänii ñäo wodëmæmö ëmongä incæte idægoidi tömengä awinca adinque, Ædö cæte Möitee awinca cōwä aquimöni, ante wægadänimpa.

⁸ Mönitö guiquënë, Wængonguï Önöwoca ingante ænte mönō quëwengæimpa, ante möni apænedö beyænque quiëmë bai godömenque nanguï apäite bai apäicæimpa. ⁹ Mönō apænte tente wænguinque edæ mänine pedæne ante ëñënamäi cægamöimpa. Incæte mänine ante nänö wææ angainö beyænque Möitee wodi awinca ñäo apäite bai ëmongacäimpa. Ìninqe ñöwo iñömö, Mönō nö cæte quëwenguinque ante Wængonguï Önöwoca ingante ængæimpa, ante möni apænedö guiquënë ñäo quiëmë bai godömenque nanguï näwante bai ënepa. ¹⁰ Wængonguï Tæiyæ Waëmö Önöwoca ingante ante möni apænedö iñömö godömenque ñäo nänö apäidö beyænque Möitee wodi nänö wææ angainö guiquënë pönömenque apäidinqe edæ wodëmäa badinque edæ dæ bapa. ¹¹ Edæ mänine mönō wodëmäa baquënëmämo incæ ñäo apäite bai iñonte Möitee wodi ænte apænegacäimpa. Wængonguï ñöwo nänö pönö äne guiquënë cōwë wodëmäa badämaï ëne inte godömenque nanguï guinæ näwante bai ënepa.

¹² Ìninqe, Wængonguï Tæiyæ Waëmö Önöwoca pönö cæcä beyænque mönō nö cæte watapæ quëwengæimpa, ante pönente quëwëmöni inte mönitö guïñënedämaï inte do apænemönipa.

13 Möitee wodi guiquënë, Nāo apāi bai botō emōnō incæ wodēmāa bamōñōmote idægoidi adāmaī incædānimpa, ante cædinque weocoo ñāne cæmongacāimpa. Mōnitō guiquënë Möitee wodi nānō ñāne cæmongai bai cædāmaī imōni inte edonque apænemōnipa. 14 Māninta, Botō wææ angainō ante eñente cædinque quëwencæminimpa, ante Wængongui nānō pedænta ante adinque idægoidi do nāni ñāne cæmongaincoo ñōwo ganca edæ ñāne cæmonte bai emōnānipa. Īninque tōmēnāni ocai omæcadāni bai bagadānimpa. Edæ Codito nempo quëwēnānique mānincoo wi cæmonte bai emōnāni inte tōmēnānique edonque adāni inānipa. Īninque idægoidi wæætē Codito nempo quëwēnāmaī ināni inte ayæ edæ wi cæmōnāmaī inte wædānipa. 15 Īninque idægoidi ñōwo ganca mimō bee otawente bai inōnāni inte Möitee wodi nānō yewæmongainta adinque eñēnāmaī inānipa.

16 Incæte Awënë gāmænō æcānō pōna tōmengā Möitee wodi nānō wi cæmōnō bai badinque do wi cætawente bai bacampa. 17 Mōnō Awënë incæ Wængongui Ōnōwoca ingampa. Ayæ waocā mōnō Awënë Ōnōwoca ingante ewocacā Īninque tōmengā wi cætawente bai entawente quëwēnongā inte wīi tee mōnete wæcā bai ingampa. 18 Mōnō tōmāmō iñōmō awinca wi cæmonte bai emōnōmō inte mōnō awocawænta bai bamompa. Īninque wadāni mōnō imonte adinque, Mōnō Awënë æbānō ñāo apāite bai emongāā, ante awocawænta ate bai edonque acædānimpa. Ayæ godōmenque ayæ godōmenque mōnō ñāo apāidō mōnō ewocaquinque mōnō Awënë nānō ewocadō bai mōnō ayæ godōmenque ayæ

godömenque ewocamö imompa. Mönö Awënë incæ Wængongui Önowoca inongä inte mänömaï pönö cæcä entawëmompä.

4

¹ Wængongui, Botö pönö cægäinö ante minitö nē apænemini incæminimpa, ante waadete pönö angä beyænque mönitö mäninö ante nē apænemöni bagaimöni inte ñowo wæ guemönämaï inte cöwë apænemönipa. ² Wadäni guiquënë tömënäni nāni guingo imonte wæquinque awëmö cädänipa. Mönitö iñömö tömënäni nāni cæwënö bai cädämaï incæmönimpa, ante do änimöni inte babæ cädämaï imönipa. Wængongui nänö apænedö ante idiquibæ apænedämaï imönipa. Wæætë Wængongui ayongä mönitö tömengä nö nänö apænegäinö ante edonque pönö odömonte apænemöni eñëinque tömänäni mïmö entawënäni iinque edæ, Pabodoidi nö ante cädänipa, ante apænebainänipa. ³ Incæte mönö Codito ingantedö ante watapæ möni apænedö iñömö ñäne cædete bai intawo. Iñæmpa ñäne cædete bai i iinque nē wë womonte wænguinäni beyænque ñäne cædete bai impa. ⁴ Wængongui nänö emönö nē emönongä inte mönö Codito iñömö mönö beyæ ñäö apäite bai cæcampa, ante watapæ mönö eñente pönönö ante apænemönipa. Ñowoguiipogaque quëwënäni beyæ guiquënë tömënäni awënë wængongui bai Tatäna nē cæcä ingampa. Tömengä iñömö mänine watapæ möni apænedö ante pïinque, Nē pönönämaï inäni adämaï incädänimpa, ante tömënäni awinca ñäne cæmonte bai wææ cæcampa.

⁵ Mönitö iñömö, Nämä incæ waa cæmönipa, ante tededämaï imönipa. Wæætë, Itota Codito incæ mönö Awënë ingampa, ante mönitö, Tömengä beyænque mönitö mïnitö iminite në cæmöni imönipa, ante mäniñque ante apænemönipa. ⁶ Wëmö iñömö ñäö apäicæimpa, ante Wængonguï incæ badongacäimpa. Adocä ñäö ante në angaingä inte ñowo wæætë mönitö mïmöno tica ënente bai cædiñque iïmaï ante odömongä amönipa. Tömengä iñömö, Botö æbänö guinæ näwante bai ëmömoo, ante mïnitö Codito awinca adinque edonque pönï acæmïnipa, ante pönö tica ënente bai odömongä amönipa.

Itota ingante mönö wede pönënö beyænque quëwëmö

⁷ Nanguï ñäö apäite bai ëwocamöni incæ önoncadedë mante bai edæ ëwocamönipa. Edæ daigænë cængæmoncadenque bai mönitö baö mongæñömönite Wængonguï, Wïi mïnitö nämä tæï piñænö beyænque ëwocamïnipa, wæætë botö tæï piñænö beyænque ëwocamïnipa, ante acædänimpa, ante badongampa. Ìniñque tömengä tæï piñænte pönö badongä æniñque mönitö ñäö apäidö möni mänö iñömö önoncadedë mante bai ëwocamönipa. ⁸ Mönitö imönite tömänö mämö mö ongonte bai cædäni wæmöni incæ gueogæ godämaï imönipa. Æbänö cæte quëwëmö imöö, ante wæmöni incæ mönitö guïñente wædämaï imönipa. ⁹ Ancaa togænte pänäni wæyömöni Wængonguï mönitö imönite cöwë ëmö cæte godämaï ingampa. Ayæ wænoncæte ante bæ tadäni incæte æmäwo wænämaï imönipa.

¹⁰ Itota tömengä nänö quëwënö pönongä æmöni beyænque mönitö, Baö ayæ mongænte quëwëmöni acädänimpa, ante cæmönipa. Tömengä nänö wængainö bai mönitö adobai wæætë wæætë wænte bai baö mongæmönipa. ¹¹ Mönitö në quëwëmöni iñömönite wadäni wæætë mönitö imönite bæi ongonte æninque, Itota beyænque wæncæminimpa, ante nanguï cädänipa. Ìninque mönitö baö ñömænguïñö ëñayömönite wadäni, Itota tömengä nänö quëwënö ëñate beyænque ayæ quëwënänipa, ante edonque acädänimpa, ante mönitö wæncæ cæte bai ëñate wæmönipa. ¹² Ìninque mönitö möni wænguïmämo beyæ ante wæyömöni minitö wæætë mini quëwenguïmämo ëñate quëwëmönipa.

¹³ Docä do apænedinque, Botö në wede pönëmo inte apænetabopa, ante yewæmongacäimpa. Tömengä wede nänö pönengainö bai adobai ewocadinque mönitö në wede pönëmöni inte adobai apænemönipa. ¹⁴ Ìmainö ante ëñëninque wede pönëmöni inte mönitö apænemönipa. Itota ingante, Ñäni ömæmöe, ante në cægaingä adocä mönitö imönite angä ate mönitö Itota tönö godongämæ ñäni ömæmoncæmönimpa, ante do ëñëmönipa. Ayæ minitö tönö mönitö tömämö iñömonte Wængonguï ænte mämö gönongä ate mönö tömengä weca godongämæ gongænguïmö imopa. Mänömainö ante do ëñëmöni inte mönitö në wede pönëmöni inte apænemöni imönipa. ¹⁵ Wængonguï godömenque nanguï inäni inänite waadete pönö cæcä ate tömënäni wæætë Wængonguï ingante waa ate pönëninque

apænecædänimpa. Ayæ mänömaï pönö cæcä adingue, Wængongui ñäö apäite bai emönongä inte mänömaï cæcampa, ante mönö tömämö watapæ apænecæimpa. Ìinque, Mänömaï bacæimpa, ante mïnitö beyæ ante mönitö tömää edæ cæmönipa.

¹⁶ Mänömaï beyæ mönitö, Æbänö cæquimönii, ante wædämaï imönipa. Edæ iimö iñö iimö iñö mönö baö godömenque wænguiñö bai mongæñömö mönö önöwoca wæætë iimö iñö godömenque iimö iñö godömenque miiwoca badonte bai ewocamompa.

¹⁷ Ìñæmpa wënæ wënæ mönö wæwënö incæ wantæ iñö wodëmää pönï badingue wodæi bai bapa. Incæte mänii mönö wæwënö beyæ mönö godömenque ñäö apäite bai ewocacæimpa. Ìinque mönö wæwënö wodæi pönï inte dæ bayö mönö ñäö apäidö mönö ewocadö wæætë cöwë wodëmää badämaï ingæimpa. Wæætë mönö watapæ quëwenguingue godömenque nanguï apäite bai bacæimpa. ¹⁸ Inguipogaque mönö quëwënö guiquënë wantæ iñö dæ gocoopa. Öönädë ñöwo mönö adämaï incoo guiquënë cöwë dæ badämaï inte ongongæimpa. Ìinque inguipogaque mönö quëwënö ante mönö adämaï inte bai pönengæimpa. Wæætë öönädë mönö adämaï incoo ante mönö cöwë ate bai pönengæimpa.

5

¹ Oncontai wido cæquintai bai mönö æmontai mongænte quëwëmompa. Ìinque mänintai wido cæmö incæte Wængongui wæætë, Öönädë miintai mïni cöwë owoquintai, ante do mænongacäimpa. Mänintai iñömö waocä önompoca mænönämaï intai

iñonte mōnō öönædē æite owoquīmō ïmompā, ante do eñēmompā. ² Ñōwo iñōmō mōnō wido cæquintai mongæninque ö ö ante nantate wæwēmompā. Mänōmaï beyæ mōnō öönædē æidinqe mōnō owoquintai eñacæte ante wæmompā. ³ Edæ, Baö ömaamö inte wæcæ wæ, ante guiñewocate wædinque mōnō, Miintai eñacæimpa, ante wæmompā. ⁴ Mōnō ïintaique eñadinque, Baö ömaamö inte wædāmaï incæmōnimpa, ante guiñewocate wæmompā. Mōnō wænguintai mongænte nantate wæmō inte ö ö ante wæmompā. Wængongui, Minitö eñate quëwenguintaique, ante yabæque wini caate bai pōnongä eñayömō mōnō wænguënēñö edæ dæ bacæimpa, ante æncæte ante wæmompā.

⁵ Ñōwo ämo eñēedāni. Wængongui incæ edæ, Mini miintai wēñate mongænguinque, ante mōnō ïmonte badongacäimpa. Ayæ, Minitö miintai cōwë pōnōmo æncæminimpa, ante, Nāwangä impa, ante odömoncæte ante Wængongui tōmengä Öñowoca ingante ñōwo da pōnongä æmompā. Ìinque tōmengä Öñowoca ingante ænte ëwocadinque mōnō, Miintai eñate mongænguinque ëwocamompā, ante do eñēmompā.

⁶ Mänōmaï beyæ mōnitö cōwë, Wængongui cæcæcäimpa, ante wede pōnente tomōnipa. Oncönë owote bai ïintaidë mōnō quëwenganca mōnō Awënë oncönë owodāmaï ïmompā, ante do eñente wædinque, ⁷ mōnitö mäninö ante ayæ adāmaï ëmömōni inte wii mōni adinö beyæ quëwëmōnipa. Wæætë mōni wede pōnënö beyænque quëwëmōnipa. ⁸ Ìinque edæ, Wængongui cōwë cæcæcäimpa, ante wede pōnëmōni inte

mönitō, İntaidē owodāmaī inte wæætē mōnō Awēnē oncōnē gote owote waa tobaimpa, ante pōnēmōnipa. ⁹ İninqe oncōnē owote baī tomōni incæ oncōnē owodāmaī inte baī wæmōni incæ mōnitō, Mōnō Awēnē waa tocæcāimpa, ante cædinque cōwē nō cæte quēwēmōnipa. ¹⁰ Codito tōmengä nänō apænte anguimpaa gäänē mōnō tōmāmō ponte edæ a ongonguēnēmō imompa. Mōnō edæ inguipoga iintai ēñate quēwēninqe mōnō cædō ante do againgä inte tōmengä iñōmō apænte ancæcāimpa. Edæ waa cægaimō imō adinqe tōmengä mōnō imonte edæ eyepæ pōni pædæ pōnongä ænguimō imaimompa. Wæætē edæ wēnæ wēnæ cægaimō imō adinqe tōmengä wæætē eyepæ pōni pangä wæbaimompa.

Wængonguī piycēnē cædinque, Pōedāni, angampa

¹¹ İninqe mōnō Awēnē ingante guiñente wæmōni inte mōnitō waodāni inānite godō waadete apænemōnipa. Codito gāmænō pōninqe watapæ quēwengæimpa, ante pōnencædānimpa, ante mōnitō godō waadete apænemōnipa. Edæ, Mōnitō æbänō ewocamōnii, ante Wængonguī do edonque acampa. Ayæ adobaī mīnitō mīmō entawēmīni inte mōnitō ewocadō ante edonque amīni ininqe botō waa tobaīmopa. ¹² Mänōmainō ante apænedinqe mōnitō, Waēmō pōni imōnipa, ante nāmā ante dicæ amōniyaa. Wæætē iūmaī ante apænemōnipa. Pancadāniya iñōmō mōnitō awincaque adinqe, Pabodoidi æbänō ewocadānii, ante adāmaī ināni inte tōmēnāni nāni adōnonque ante pōnēninqe nāmā ængō cæte baī todānipa. Mīnitō guiquēnē, Mōnitō æbänō ewocamōnii, ante

do amñnitapa. Īniquē tōmēnāni mōnitō ĩmōnite ante pñinte ānāni ēñēniquē mñnitō wæætē edæ, Pabodoidi nō ēwocadāni inte waa cædāni amōnipa, ante wææ apæñecæmñnipa, ante cæbopa. ¹³ Edæ òmæcamōni baī cæmōni incæte Wængonguī beyænque ante mănōmaī cæmōnipa. Wæætē nō pōnente cæmōni incæ mñnitō beyæ ante cæmōnipa.

¹⁴ Īimainō ante pōnente wædinque edæ mănōmaī cæmōnipa. Tōmāmō beyæ adocanque wængacāimpa, ante adinque mōnitō, Mōnō tōmāmō do wængamōimpa, ante edonque ēñēmōnipa. Īniquē, Mōnō Codito nanguī waadete pōnengā inte pōnō cæcampa, ante pōnēniquē mōnitō ædō cæte wapiticæ cæquimōnii. ¹⁵ Mōnō Codito ĩñōmō tōmāmō beyæ wæniquē, Mñnitō idæwaa nāmā beyænque quēwēmñnipa, ante wængacāimpa. Ayæ, Botō nē wænte ñāni òmæmongaīmo ĩñōmote mñnitō botō beyæ ante quēwencæmñnipa, ante cædinque tōmengā tōmāmō beyæ wængacāimpa. ¹⁶ Mănōmaī impa, ante pōnēniquē mōnitō ñōwo ĩncayæ ate waodāni ĩnānite adinque, Inguipogaque ēñate quēwēñānipa, ante pōnēñāmaī ĩmōnipa. Edæ mōnō Codito incæ inguipoga ēñate quēwēñongante mōnitō mănōmainō ante pōnengāimōni incæte mōnitō ñōwo wæætē mănōmainō ante wīi pōnēmōnipa. ¹⁷ Īniquē Codito nempo æcānō quēwēnaa tōmengā ingante Wængonguī mñngā badongā ate mñngā bate quēwengampa. Tōmengā nānō inguipogaque nānō quēwēñimāmo edæ dæ gotimpa. Nōwo wæætē edæ mñmāmōque ēwocacampa.

¹⁸ Māññō botō ānō ante tōmānō nē pōnō

badongä iñömö edæ Wængongui adocanque ingampa. Tömengä iñömö, Minitö eñënamai cæmini incæte Codito pönö cæcä beyænque botö piyænë cæcæboimpa, angampa. Ìinque botö piyænë cæbo adinque minitö botö gämænö pöedäni, angampa. Ayæ mönitö imönite pönö angä eñëninque mönitö wæætë edæ wadäni inänite, Wængongui piyænë cædinque, Pöedäni, angampa, ante nê cæmöni batamönipa. ¹⁹ Ìinque iïmai ante apænemönipa. Codito tönö godongämæ cædinque Wængongui iñömö piyænë cædinque, Inguipoga quëwëmini tömämïni botö gämænö pöedäni, angampa. Pömïni adinque botö, Æpogadö wënæ wënæ cæmïnitawo, ante tee mante adämai inte piïnämai incæboimpa, angampa.

Tömengä mänömai angä eñëninque mönitö wæætë mänine ante nê waadete apænemöni badinque edæ, Wængongui piyænë cæcä adinque pöedäni, ante apænemönipa. ²⁰ Ìinque Wængongui mönitö imönite äninque, Minitö wæætë botö beyæ wadäni inänite waadete apænemïni eñëninque poncædänimpa, angä eñëninque mönitö wæætë Codito beyænque nê waadete apænemöni bamönipa. Ìinque minitö imönite waadete pönö apænedinque mönitö, Wængongui gämænö pöedäni, ante Codito beyænque ante apænemönipa. ²¹ Wængongui, Minitö Codito nö nänö ëwocadö ænte ëwocacæmïnimpa, ante pönö cædinque Codito ingante angä eñëninque tömengä iñömö edæ wënæ wënæ ëwocadämai inte wæætë edæ mönö beyæ ante nê wënæ wënæ cæcä bai badinque mönö wentamö ëwocadö incæ mongængacäimpa. Ìinque

mönitō tōmengā nempo quēwēninqe nō pōnī
tōmengā nānō ēwocadō wæætē ænte ēwocamompa.

6

¹ Tōmengā tōnō godongāmæ nē cæmōni
inte mōnitō mīnitō imīnite iīmaī ante waadete
apænemōnipa. Wængonguī waadete pōnō cæcā
æmīni inte mīnitō wīī ōnonque oda cæcæte ante
æncæmīnimpa, ante nangui āmōni ēñēmaīmīnipa.

² Edæ Wængonguī do angacāimpa,

“Mīnitō imīnite botō waadete pōnō cæyedē
māniñedē mīnitō apænemīni ēñentabopa.

Ayæ, Mīni quēwenguīōnæ impa, ante Codito nānō
bæi ongonte æñedē botō māniñedē mīnitō
beyæ pōnō cægaboimpa.”

Ante yewæmongatimpa. Iīninqe botō iīmaī āmo
ēñēedāni. Wængonguī tōmengā nānō waadete
pōnō cæyedē do ba apa quēwēmīnii. Codito edæ
ængā beyænque mīni quēwenguīōnæ iñōmō edæ do
batimpa cæmīnii.

³ Mōnō quēwenguīnō ante adocanque incæ
Wængonguī beyæ mōni apænedō ante pīnāmaī
incæcāimpa, ante wææ cædinque mōnitō iñōmō
idiquibæ cædāmaī imōnipa. ⁴ Wæætē mīnitō,
Pabodoidi Wængonguī beyæ nē cædāni inānipa,
ante acæmīnimpa, ante odōmoncæte ante mōnitō
cōwē iīmaī cæmōnipa. Cōwē nantate wæmōni incæ
wēnæ wēnæ cædāni wæmōni incæ mō ongonte
wææ cædāni wæmōni incæ æbāmenque wæmōni
incæte mōnitō cōwē wæntæye badāmaī inte ee
cæmōnipa. Ædō cæte quēwenguīī, ante wæmōni
incæ Wængonguī beyæ nē cæmōni inte mōnitō
godōmenque cæmōni aedāni. ⁵ Ayæ tæi tæi pānāni

wæmōni incæ tee mōnedāni wæmōni incæ Yæ yæ ante mōnitō imōnite wido cædāni incæte mōnitō wæætē Wængonguī ingante nē cæmōni inte edæ nanguī cæmōnipa. Ayæ woyowotæ nanguī cædinque mōnitō mōwo mōnāmaī inte cæmōni incæ cænguī cænāmaī inte gæwænte wædinque cæmōni incæ mōnitō godōmenque cæmōni aedāni.

⁶ Mānōmaī cædinque mōnitō wentamō mongænāmaī inte cæmōnipa. Ayæ wadāni æbāmenque cædāni incæ mōnitō nō ēñēmōni inte edæ piyænē cæte pīinte änāmaī imōnipa. Wæætē waadete cæmōnipa. Edæ Wængonguī Tæiyæ Waēmō Önōwoca nempo quëwëninque nāwangä waadete pönēmōnipa. ⁷ Wængonguī nānō tæi pīñænō ewocadinque mōnitō Wængonguī nō nānō angainō ante apænemōnipa. Ayæ tontadoidi guëadō guëa wænoncæte ante tipæmāa næænāni bai cædinque mōnitō nō pōni cæcæte ante Wængonguī nānō tæi pīñænō ante eyepæ næænte bai cæmōnipa.

⁸ Mōnitō imōnite waa adāni incæ wīwa adāni incæte mōnitō Wængonguī beyænque ante cæmōnipa. Pabodoidi waa pōni cædānipa, ante nō apænedāni incæ wæætē, Pabodoidi wënæ wënæ cædānipa, ante tedewënāni incæ mōnitō cōwë godōmenque cæmōnipa. Pabodoidi babæ cædānipa, ante pīināni incæte mōnitō nōingä pōnente Wængonguī beyænque ante cæmōni aedāni.

⁹ Edæ tōmānāni mōnitō imōnite do edonque pōni adāni incæ adāmaī inte bai cædinque, Önömīnique imīnipa, ante tededānipa. Wæncæ cæmōni incæte ee quëwëmōnipa. Pānāni wæmōni incæte mōnitō imōnite wænōnāmaī inānipa. ¹⁰ Wæwëmōni incæte

mönitö cōwē mīmōno watapæ towocamōnipa. Mönitö mǎincoo ömæpomōni incæ wadāni inānite godö cæmōni æninqe tömēnāni mǎincoo nangūi pōni ænte bai eyepæ pōni entawēnānipa. Edæ nē ömæpomōni inte wæmōni incæte mönitö tōmancoo pōni entawēmōni inte Wængongui ingante nē cæmōni imōni aedāni.

¹¹ Coodintoidi eñēedāni. Minitö imīnite mönitö edonque pōni apænetamōnipa. Minitö imīnite nangūi pōni waadete pönēmōnipa. ¹² Mönitö dicæ pæ gompote minitö imīnite waadedāmai imōniyaa. Wæætē edæ tömēmīni pæ gompodinqe edæ mönitö imōnite waadedāmai imīni inte wæwēmīnipa. ¹³ Ininqe botö wēñæmīni bai iñömīnite iīmai āmopa. Minitö imīnite waadete pönēmōni adinqe minitö näēmæ waadete pönēedāni.

Wængongui nē Quēwengā nānō owocö bai imompa, ante

¹⁴ Guëa mangæ mangæ woquīna, ante wagada tönö bodo guëa goti wēmencadāmai iedāni, ante do yewæmongatimpa cæmīni. Pönēnāmai ināni tönö godongāmæ cædāmai iedāni. Iñæmpa nē nō cæcā tönö guëa āantawente bai nē eñēnāmai cæcā guiquēnē dicæ adobai entawengää. Ayæ ñāö entawengā tönö guëa gocæte ante cædinque nē wēmö entawengā iñömö mīmö ñāö entawengampa diyæ guëa goquingää. ¹⁵ Codito nānō pönēnō ante edæ wēnæ awēnē Bediado iñömö edæ adodö ante pönengampa diyæ guëa cæquingää. Nē wede pönengā nānō pönēnō ante nē pönēnāmai ingā iñömö edæ adobai pönengampa diyæ adobai quēwengingää. ¹⁶ Ayæ, Wængongui

impa, ante waodäni näni badöninca æninqe edæ nāwā Wængonguī tæiyæ waëmō oncönē ædō cæte mangui cō cæquī. Mönō guiquēnē Wængonguī nē Quēwengā nānō tæiyæ waëmō owoquincō bai iñömote tömengä Önōwoca mönonga pō guite owocampa. Ìninqe tömēnāni tönō mönō ædō cæte godongāmæ cæquī. Wængonguī incæ, Mänömaī impa, ante ancæte ante iīmaī angacāimpa.

“Waodäni weca owodinqe botō tömēnāni tönō godongāmæ cægoncæboimpa.

Botō tömēnāni Wængonguī iñömote tömēnāni wæætē botō quīnāni incädānimpa,” angacāimpa.

17 Mänömaīnō ante apænedinqe mönō Awēnē adobai ante,

“Wadäni inänite taayænte pöninge nänēnē ponte quēwēedäni, angampa.

Wentamō i adinqe gampodāmaī iedäni.

Mänömaī cæmīni adinqe botō mīnitō imīnite, Pöedäni, ante ee æncæboimpa.

18 Æninqe, Mīnitō Wæmpobo inōmo inte botō, onguīñæmīni incæ onquiyæmīni incæ, Botō wēmīni imīnīpa, ante æncæboimpa, ante nē Tæi Piñænongä inte Awēnē Wængonguī angampa.”

Ante Wængonguī beyæ yewæmongatimpa.

7

1 Ìninqe botō nē waademīni eñēedäni. Mönō iñömō, Wængonguī, Cōwē cæcæboimpa, ante nānō angainō ante do eñengamöimpa. Ìninqe baonga wentamō mönō eñadō tönō mīmō mönō wentamō entawēnō adobai ñā mēnongate bai cædinque edæ

mönö tæiyæ waëmö ewocate quëwengæimpa. Ayæ, Wængonguï ingampa, ante guïñente wædinque mönö, Cöwë nō cæte waa quëwengæimpa, ante nanguï cæcæimpa.

Coodintoidi Codito gämænö pönänipa

² Mönitö dicæ wacä ingante wënæ wënæ cæmöniyaa. Wacä wentamö nänö mongænguinque mönitö dicæ wënæ wënæ cæmöniyaa. Dicæ wapiticæ apænedinque wacä quï ö æmöniyaa. Ìninqe, Pabodoidi mänömaï cædämaï inänipa, ante adinque mīnitö wæætë mönitö imönite waadete pönëninque ëñëedäni, ämopa. ³ Mänömainö ante ämo incæte botö, Mīni pante wæquinque, ante dicæ apænte ämogaa. Edæ botö do antabopa. Mīnitö tönö möni quëwenguinque incæ mīnitö tönö möni wænguinque incæ mönitö mīnitö tönö äanque bai entawente mīnitö iminite cöwë waadete pönëmönipa, antabopa. ⁴ Edæ, Mīnitö nō pönente cæmīni imīnipa, ante pönëmopa. Mönitö apænemöni ëñëninque mīnitö në waa cæmīni bamīnitapa, ante adinque botö mönitö apænedö ante nanguï tobopa. Mīnitö mänömaï cæmīni imīnipa, ante ëñente wædinque botö gancæ pönëmopa. Ìninqe mönitö wënæ wënæ inte wæwëmöni incæte botö wæætë godömenque watapæ tobopa.

⁵ Ìimaï edæ Mäatedöniabæ pöninque cætamönipa. Æmætæ æmætæ gote apænecæte ante cæyömönite wadäni bæ ta bæ ta cædäni wædinque mönitö ædö cæte guëmanguimönii. Edæ nanguï pīinte cædäni wædinque mönitö baonga nantate wædinque önöwoca adobaï

guiñente wæwocatamönipa. ⁶ Incæte mönitö wæwëñömönite, Nē wæwënāni gancæ bacædānimpa, ante nē pönö cæcā inongä Wængongui iñömö Tito ingante da pönongä pongä adinque mönitö wæætē gancæ pönentamönipa. ⁷ Tömengä ponte a ongongä beyæ gancæ pönëñömönite tömengä, Coodintoidi botö imote waa cædāni adinque botö wæætē gancæ pönentabopa, ante apænecä ëñente mönitö godömenque totamönipa. Ayæ botö imote ante apænedinque tömengä, Bitö imite ante nanguï ainente wædinque coodintoidi Ca ca wædānipa. Tömënāni iñömö, Mönö ñöwo Pabodo beyæ ante nanguï cæcæimpa, ante wædānipa, ante Tito tedecä ëñëninque botö godömenque nanguï totabopa.

⁸ Botö doyedë cadota ante yewæmöninque da godömo æninque mīnitö wæwente bamīnitawo. Nāwangä botö cadota beyæ wæwente bamīnitapa, ante wædinque botö, Quinante mänömaï yewæmömoï, ante wætabopa. Incæte ayæ ate, Coodintoidi wantæ iñö wæwëninque ñöwo iñömö edæ wæwënāmaï inānipa, ante adinque botö ñöwo edæ, Nö cædinque yewæmömoimpa, ante piyænë cæbopa. ⁹ Edæ mīnitö wæwëmīni beyæ todāmaï inimo inte botö wæætē, Mīni wënæ wënæ cædinö ñimpo cædinque mīnitö Codito gämænö mīni ponguinque wæwente bamīnitapa, ante adinque mänömaï beyænque totabopa. Edæ Wængongui nänö änönö mīni ëñenguinque wæwente bamīni ininque mönitö cædö beyæ dicæ wæmīniyaa.

¹⁰ Edæ Wængongui nänö änönö ante wæwëmö bai mönö ocæ ëmænte ponte quëwenguinque

impa. Īninqe, Quĩnante mǎnōmaĩ wǎwēmōi, ante wǎdāmaĩ ĩmōpa. Wǎætē inguipoga mōnō quēwenguĩmāmo ante wǎwēmō bai mōnō wǎnguinque impa. ¹¹ Edǎ Wǎngonguĩ nǎnō ǎnōnō ante do wǎwēnĩmĩni inte mĩnitō ñōwo, Mǎnĩnō mōni wǎwēnō beyǎ æbǎnō entawēmōnii, ante nǎmǎ aedāni. Edǎ mǎnōmaĩ wǎwēmĩni inte mĩnitō, Mōnō ee ongōnǎmaĩ inte cǎcǎimpa, ante do cǎmĩnitapa. Cǎdinque, Mōnō pōnencabo wentamō mongǎnǎmaĩ ingǎimpa, ante nanguĩ cǎdinque mĩnitō nē wēnǎ wēnǎ cǎdingǎ ingante edǎ do pĩimĩnitapa. Ayǎ, Pabodo æbǎnō anguingǎǎ, ante guĩñente wǎmĩni incǎte botō ĩmote ante ǎĩnente wǎmĩnitapa. Ayǎ, Nē wēnǎ wēnǎ cǎdingǎ ingante mōnō nō ante pangǎimpa, ante do cǎmĩnitapa. Mǎnōmaĩ eyepǎ cǎdĩmĩni inte mĩnitō wentamō mongǎnǎmaĩ ĩmĩnipa, ante edonque abaimpa.

¹² Īninqe mĩnitō ĩmĩnite yewǎmōninqe botō nē wēnǎ wēnǎ cǎdingǎ beyǎ ante wĩi yewǎmontabopa. Tōmengǎ wēnǎ wēnǎ cǎcǎ wǎdingǎ beyǎ ante adobaĩ yewǎmōnǎmaĩ intabopa. Wǎætē mĩnitō Wǎngonguĩ ayongǎ nǎmǎ adinqe, Mōnitō Pabodoidi ĩnĩnite waadete amōnipa, ante, Nǎwangǎ impa, ante edonque acǎmĩnimpa, ante botō mĩnitō beyǎenque ante yewǎmontabopa. ¹³ Mĩnitō mǎnōmaĩ cǎmĩni adinqe mōnitō wēenēñedē nē wǎwēmōni inte ñōwo ĩñōmō gançǎ pōnēmōnipa.

Mĩnitō waa cǎmĩni beyǎ wēenēñedē wǎwēningǎ inte Tito adobaĩ gançǎ pōnente ñōwo watapǎ pōnengampa, ante adinqe mōnitō do gançǎ pōnēmōni inte ñōwo godōmenque nanguĩ tomōni ĩmōnipa. ¹⁴ Botō do ĩnōñedē Tito ingante

apænedinque, Coodintoidi waa cædāni abopa, antabopa. Ñowo mīnitō waa cæmīni adinque botō, Tito ingante botō apænedinō nō impa, ante adinque botō guingo imōnāmaī imopa. Edæ botō mīnitō imīnite nōinō ante apænetawo. Edæ mīnitō imīnite nōinō ante apænebo baī botō Tito ingante, Coodintoidi waa cædānipa, ante apænedinque adobaī nōinō ante apænetabopa. ¹⁵ Ayæ Tito iñōmō, Coodintoidi tōmānāni botō imote waa adinque guiñente wædānitapa. Ayæ, Pōe, āninque tōmēnāni botō apænebo eñēninque Ao ante eñente cædānitapa, ante pōnēninque tōmengā mīnitō imīnite godōmenque waadete pōnengampa. ¹⁶ Ayæ, Mīnitō cōwē waa cæmīni imīnipa, ante pōnēninque edæ botō adobaī watapæ tobopa.

8

Mōnō godōmenque nanguī godongæimpa, ante

¹ Ñowo botō tōniñadāni apænebo eñēedāni. Māatedōniabæ iñōmō Codito ingante godongāmæ nāni pōnencabo wayōmō nāni cabo wayōmō nāni cabo ongōñōnānite Wængonguī Ōnōwoca pōnō apænecā eñēninque tōmēnāni wæætē waadete cædinque iīmaī cædānipa. ² Nanguī wēnæ wēnæ nantate wæwēnāni incæ tōmēnāni cōwē piyænē cæte watapæ todānipa. Īninque ōmæpodāni incæte tōmēnāni nanguī mānāni baī cædinque, Wængonguī quīnāni quī, ante godōmenque todinque nanguī gomonga godōnānitapa. ³ Tōmēnāni edæ nāni godonguēnēnō ganca do godōninque ayæ godōmenque nanguī godōnāni adīmo inte botō, Nāwangā impa, ante apænebopa. Ayæ edæ

tömənäni nāni nāmā pönənō bai cædinque,
 4 Wængonguī quīnāni beyæ impa, ante mōnitō
 wadāni tönō godongāmæ godoncæmōnimpa, ante
 tömənāni mōnitō imōnite nanguī āninqe ancaa
 änānitapa. 5 Mōnitō guiquēnē, Māatedōniabæ
 quēwēnāni tömənāni nāni godonte æintaque
 godonguīnāni inānipa, ante edæ pōnentamōnipa.
 Incæte tömənāni, Wængonguī quīmōni imōnipa, ante
 edæ Wængonguī ingante nāmā godōninqe ayæ,
 Mīnitō imīnite nē cæmōni bacæmōnimpa, āninqe
 mōnitō imōnite edæ adobaī nāmā pōnōnānitapa.
 Ayæ mōnitō pönənō ganca adobaī godōninqe
 tömənāni nāni godonte æinta ayæ godōmenque
 godōnānitapa.

6 Māatedōniabæ quēwēnāni mănōmaī cædāni
 adinqe mōnitō Tito ingante iūmaī antamōnipa.
 Bitō doyedē āmi ēñēninqe coodintoidi waadete
 pōnēninqe tæcæ godoncæ cædānitapa cæbii.
 Nōwo wæætē āmi ēñēninqe tömənāni nē waadete
 godōnāni badinqe eyepæ godoncædānimpa, ante
 mōnitō Tito ingante nanguī antamōnipa. 7 Mīnitō
 iñōmō wede pōnēmīni inte edæ nē waa pōni
 apænēmīni imīnipa. Ayæ godōmenque gomonga
 ēñēmīni inte mīnitō, Mōnō cōwē cæcæimpa, ante
 nanguī cædōmīni imīnipa. Ayæ mōnitō imōnite nē
 waadete pōnēmīni imīnipa. Mănōmaī tömānō ante
 do cædōmīni inte mīnitō ñōwo adobaī, Wængonguī
 quī, ante mōnō nē waadete godōmō bacæimpa,
 ante edæ nanguī cæedāni, āmopa.

8 Mănōmainō āninqe botō, Cæedāni, ante
 wææ änāmaī imopa. Wæætē, Mīnitō æbānō
 cæmīnii, ante ēñencæte ante cædinque botō
 wadāni nāni nanguī cædīnō ante apænetabopa.

Mänömainö ante apænedinque botö, Minitö adobaï tömënäni näni cæbaï nanguï waadete pönente cæminitawo, ante acæte ante cædinque, Nē godömīni baedāni, antabopa. ⁹ Minitö do eñēmīnīpa. Mönö Awēnē Itota Codito öönædē quēwēnīnque nanguï gomonga ēnempogaingā inte mönö imonte waadete pönēnīnque iīmaï ante pönö cægacāimpa. Botö ömæpobo babo beyænque mīnitö nanguï wæætē entawencæmīnīmpa, ante cædinque tömengā edæ mīnitö beyænque ante inguipoga pönīnque edæ ömæpocā bagacāimpa.

¹⁰ Ayæ, Mänīnö mīni godonguīnö ante æbänö cæquēnēmīni imīnīi, ante botö nämā pönēnīnque iīmaï ämopa. Wadepo inöñedē wadāni godönāmaï iñönāni mīnitö iñömö edæ do tāno godömīnitawo. Mönö godongæimpa, ante edæ mīnitö cöwē tāno cæinēmīni imīnitawo. ¹¹ İnīnque, Mönö godongæimpa, ante quingæ änīmīni inte ñöwo edæ iīnque cæedāni. Mīni ēadincoo adīnque mīnitö, Eyepæ inte botö pancacooga godoncæboimpa, ante mīni änīncoo edæ godömīni adīnque, Eyepæ godömīnīpa, ante acæimpa. ¹² Edæ æcänö godöinengā tömengā nänö godonte æinta tömanta adīnque, Æpotadö botö godonguēnēmo imoo, ante adīnque mänīmpotaque godöinīnque idæwaa. Godömenque nanguï mangampa diyæ nanguï godonguingää.

¹³ Mänömaï änīnque botö, Wadāni pönömenque godöinīnque guēmāñönāni mīnitö wæætē mīni eyepote wæquinque godömenque nanguï godoncæmīnīmpa, ante dicæ ämogaa. ¹⁴ Wæætē, Cöwē eyepæ bacæimpa, ante ämopa. Edæ mänīncoo

ñowo eyepæ mäninque mīnitō nē ænguēnente wædāni inānite godōmīni ænānīpa. Īnīnque ĩncayæ ate mīnitō wæætē nē ænguēnēmīni bamīni ate tōmēnāni wæætē eyepæ mante ate mīnitō ĩmīnite pōnōnāni æñōmīni adopo adopo edæ eyepæ babaimpa. Mänōmainō ancæte ante ämopa. ¹⁵ Edæ do yewæmongatimpa. “Cænguī gomonga wææmpo æningä incæ tōmengä nānō ænguēnenganca ænte bai mäninque godōmenque mänāmaī ingantapa. Wæætē edæ wædænque wææmpo æningä guiquēnē tōmengä nānō ænguēnenganca eyepæ ænte bai eyepæ mangantapa.” Ante nāni yewæmongainō bai ĩnque bacæimpa, ante mīnitō ĩmīnite ämopa.

Mīnitō weca Titoidi poncædānimpa, ante

¹⁶ Botō cōwē, Coodintoidi beyæ cæcæimpa, ante mīnitō ĩmīnite waadete pōnēmopa. Ayæ, Wængonguī pōnō apænecä ēñēnīnque Tito ĩñōmō botō pōnēmō bai adobai pōnente cæcampa, ante adīnque botō wæætē Wængonguī ingante waa ate pōnēnīnque apænebopa. ¹⁷ Edæ mōnitō, Coodintoidi weca goe, ämōni ēñēnīnque edæ Tito do Ao ante pongä aedāni. Incæte wīi mōnitō änīnō beyænque pongampa. Wæætē nāmanque pōinente wædinque tōmengä nanguī todīnque mīnitō weca pongampa.

¹⁸ Ayæ Tito tōnō wacä mōnō tōniñacä ingante da pōnōmōni pongampa. Īngä Tito tōnō nē pongä ĩñōmō tōmengä Codito ingantedō ante watapæ mōni apænedō ante nē apænecä ingampa. Īnīnque Codito ingante godongāmæ nāni pōnencabo wayōmō nāni cabo wayōmō nāni cabo tōmānāni

tömengä ingante waa ate waa apænedänipa. ¹⁹ Codito ingante nani pönencabo incæ adocä ingante apænte æninque, Pabodoidi tönö gocæbiimpa, ante da godönäni ate tömengä mönitö tönö godongämæ goquingä ingampa. Edæ mönitö, Mönö Awënë ñäö apäite bai emongä ingampa, ante acædänimpa, ante cædinque ayæ, Mönitö wadäni beyæ cæinëmönipa, ante acædänimpa, ante cædinque minitö da godonguincoo ænte goquimöni imönipa. Mänömai cæcæte ante goyömöni, Tömengä godongämæ gote cæcæcäimpa, ante da godönäni gocæcäimpa. ²⁰ Edæ wadäni, Pabodoidi babæ cædänipa, ante änämai incædänimpa, ante wææ cædinque mönitö nö pönä cædinque nangui pönä minitö godonguincoo ænte godinque pædæ godoncæmönimpa. ²¹ Edæ, Mönitö Wængongui ayongä nö cæmöni inte waodäni ayönäni adobai edonque pönä cædinque nö pönä cæcæimpa, ante cæmönipa.

²² Ayæ wacä mönö töninäcä iñongante mönitö æpogamë cöwä ayömöni tömengä cöwë tömää nö cæcä inongampa. Ayæ ñöwo tömengä, Coodintoidi nö cædänipa, ante pönengä inte godömenque waa cædongä ingampa. Mänömai ingampa, ante adinque mönitö ñöwo tömengä ingante da godömöni godinque tömengä iñäna tönö minitö weca poncæcäimpa. ²³ Tito iñömö botö tönö godongämæ cöwë cæcampa. Ìinque minitö beyæ guëa në cæmöna imönäpa. Codito ingante nani godongämæ pönencabo incæ mönitö töninäda Tito tönö wada inate da godönäni godinque tömönäni, Mönö Codito ingante waa acædänimpa, ante

nanguī cæda inapa. ²⁴ Īnāni Īnānite apænedinque mōnitō, Coodintoidi nē waa cædāni Īnānipa, ante do apænetamōnipa. Īninqe mīnitō eyepæ godōmīni adinque tōmēnāni, Nāwangā impa, ante edonque acædānimpa. Ayæ adobaī, Mīnitō waadete pōnō cæmīni adinque Pabodoidi wæætē mīnitō imīnite waa adānipa, ante acædānimpa, ante cædāni. Mānōmaī cæmīni adinque Codito ingante godongāmæ nāni pōnencabo wayōmō nāni cabo wayōmō nāni cabo tōmānāni adobaīnō ante edonque acædānimpa.

9

Mōnō wædāmaī eyepæ pōni godongæimpa, ante

¹ Nōwo mānīnō, Wængonguī quīnāni beyæ mīnitō godoncæmīnimpa, ante botō idæwaa yewæmōmopa. ² Edæ, Mīnitō wædāmaī inte do cæmīnipa, ante ēñēninque botō Māatedōniabæ quēwēnāni Īnānite apænedinque, Acayabæ quēwēnāni ĩñōmō wadepo ĩnōñedē do godoncæte ante cædōnānimpa, ante do apænetabopa. Apænebo ēñēninque tōmēnāni wodo tōmānāni, Æ Acayabæ quēwēnāni nāni quingæ cæbaī mōnō adobaī cæcæimpa, ante cædānipa.

³ Incæte botō nōwo mōnō tōniñadāni Īnānite da godōmo pōninque tōmēnāni mīnitō imīnite apænedāni ēñēninque mīnitō wæætē eyepæ godoncæmīnimpa. Mānōmaī cæmīni ate botō babæ apænedāmaī ĩmoī, ante edonque ēñengæimpa.

⁴ Īñæmpa Māatedōniabæ quēwēnāni botō tōnō godongāmæ ponte ayōnāni mīnitō wīī eyepæ cæmīni adinque tōmēnāni wæætē, Mīnitō

dicæ cæmīnyaa, ante badete tobainānīpa. Ayæ mōnitō guiquēnē, Coodintoidi īnque cæcædānīpa, ante nē ānīmōni inte odadete guingo imonte wæbaīmōnīpa. Mīnitō adobaī, Mōni cæquēnēnō cædāmaī īmōnīpa, ante guingo imonte wæbaīmīnīpa. ⁵ Īnque mīnitō, Godoncæmōnīpa, ante mīni ānīnō baī eyepæ godoncæmīnīpa. Ante cædinque botō mōnō tōnīñadāni inānite ānīnque, Mīnitō gote apænemīni ēñēnīnque coodintoidi ædæmō pōnente cæcædānīpa, ante da pōnōmo pōnāni aedāni. Īnque mīnitō tōnō godongāmæ cædāni ate mīnitō ædæmō pōnēnīnque, Botō wææ gompodāmaī inte waa todīnque godōmopa, ante godoncæmīnīpa.

⁶ Īmaī ante pōnēedāni. Wædænque quiyadingā iñōmō amiñāimō wædænque pete æncæcāīpa. Nanguī quiyadingā guiquēnē amiñāimō nanguī pete æncæcāīpa. ⁷ Wadāni quī, ante æcānō watapæ todīnque godōnaa, ante adīnque Wængonguī tōmengā ingante waadete pōnengampa. Īnque wadāni wææ ānāmaī iñōnāni mīnitō, Botō æpotadō godonguīmoo, ante pōnēnīnque tōmāmīni wædāmaī inte mīni ānīmpota adopota godōnīnque do godonguēnēmīni īmīnīpa. ⁸ Ayæ, Eyepæ pōnī ēamīni inte mīnitō quiēmē cæmīni incæ tōmānāni beyæ ante cōwē godō waa cæcæmīnīpa, ante Wængonguī cæcampa. Īnque, Mīnitō eyepæ ænte ēadīnque mānōmaī cæcæmīnīpa, ante tōmengā nanguī cædongā inte cōwē eyede tate baī waadete pōnō cæcā ingampa. ⁹ Edæ docā ingante ante īmaī ante yewæmongatīpa.

“Yepanca quiyacā baī īnongā inte tōmengā,

Ömæpodäni qui, ante wayömö wayömö
godongantapa.

Īninqe tōmengä nō nänö cædinö iñömö edæ cōwē
ēwēnāmaī ongongæimpa.”

¹⁰ Ante yewæmongatimpa. Nē quiyacä ingante
Wængonguī, Tömēmö quiyaquimö, ante eyepæ
pönöninge adobai, Cænguī, ante tōmämö imonte
eyepæ pönongä ænte cæmompæ. Minitö iñömö
eyepæ ēamīni inte wacä ingä wacä ingä quiyate
bai nēnempocæminimpa, ante cædinque Wængonguī
mīni godonganca da pönöninge godömenque
gomonga da pönongä æncæminimpa. Mänömaī
eyepæ da pönongä æninque mīnitö wæætē nō
cædinque wadäni nanguī ināni inānite nēnempomīni
æninque tōmēnāni wæætē amiñaimö tā pete
bai watapæ quēwencædānimpa. ¹¹ Minitö pæ
gompodāmaī inte wadäni inānite cōwē pædæ
godoncæminimpa, ante cædinque mīnitö imīnite
Wængonguī nanguī pōni pönongä æncæminimpa.
Æninque mīnitö pæ gompodāmaī inte pædæ godö
pædæ godö cæmīni adinque mōnitö wæætē,
Coodintoidi mänömaī cædānīpa, ante tedemōni
ēñēninque wadäni wæætē Wængonguī ingante waa
ate pönēninque apænecædānimpa.

¹² Wadäni qui, ante do godömīni æninque
Wængonguī quīnāni tōmēnāni nāni ænguēnēnō
ante eyepæ pōni æncædānimpa. Ayæ mīni
godönö æninque tōmēnāni mīmōno eyede tate bai
Wængonguī ingante waa ate pönēninque nanguī
apænecædānimpa. ¹³ Mönö Codito ingantedö ante
watapæ ēñēninque mīnitö Ao ante do pönēmīnitapa.
Īninqe Wængonguī nänö änönö ante do ēñente

cædinque mīnitō, Ömæpodāni qui, ante pædæ godömīni æninque nē ænāni wæætē Wængonguī ingante, Bitō ñāō bai nō pōni cæbi ate coodintoidi bitō ānōnō ante ēñente cædānīpa, ante watapæ apæ necædānīpa. Ayæ nē ænināni inte adodāni godōmenque apænedinque, Nē ömæpodāni tōmānāni īnānite da godōninque coodintoidi īñömō mōnitō imōnite adobai eyepæ pōnōnāni æmōnīpa, ante Wængonguī ingante godōmenque waa ate apæ necædānīpa. ¹⁴ Ayæ, Coodintoidi īnānite Wængonguī godōmenque nanguī waadete pōnō cæcā beyænque tōmēnāni waa cædāni īnānīpa, ante pōnēninque nē ænināni īñömō edæ mīnitō imīnite waadete pōnēninque mīnitō beyæ ante Wængonguī ingante apæ necædānīpa.

¹⁵ Wængonguī īñömō godōmenque waa cædinque mōnō Codito ingante da pōnongā ængamōīpa. Īninque mōnō, Wængonguī, bitō waa pōni pōnō cægabiīpa, ante mōnitō ædō cæte eyepæ inte waa ate pōnente apænequīmōnīi, ante mōnō Wængonguī ingante apæ necæīpa.

10

Pabodo, Itota nānō nē da godōnīmo īmopa, angampa

¹ Mīnitō, Wayōmonque quēwēninque Pabodo nanguī piinte angampa, ante pōnēmīnitawo. Wæætē mōnitō weca pōninque awincadō awinca adinque tōmengā guīñēnete wædinque pæ wēēnecampa, ante pōnēmīnitawo. Īñæmpa mīni ānōmo mānīmotō inte īmaī āmopa. Codito īñömō edæ gānē pōnengā īnongā inte pōnō

piyænē cæcantawo. Botō adobaī ñōwo piyænē cædinque mīnitō imīnite pōnō waadete apænebopa. ² Pabodoidi iñōmō inguipogaque ante pōnente cædānīpa, ante pancadāniya odadete ānewēnānīpa. Tōmēnāni inānite botō guiñēnedāmaī inte nanguī ancæboimpa. Mīnitō guiquēnē adobaī odadete āmīni inīnque botō mīnitō weca pōninque piinte anguēnēmo imāimopa. Inīnque, Wīi piinte anguīmo bacæboimpa, ante wææ cæcæte ante botō ñōwo mīnitō imīnite, Ee aquēnē quēwēmīni, ante waadete pōnente yewæmōmopa.

³ Edæ inguipoga quēwēmōni incæte mōnitō Wængonguī beyæ ante wæætedō wæætē cæcæte ante cædinque inguipogaque quēwēnāni nāni wæætedō wæætē cæi baī cædāmaī imōnīpa. ⁴ Wæætē edæ mōnitō Wængonguī beyæ ante wæætedō wæætē cæcæte ante cædinque inguipogaque quēwēnāni nāni wænoncaquincoo næænāmaī inte cæmōnīpa. Wæætē Wængonguī tōmengā nānō tæi piñæmāmo ænte mīmōno entawēnīnque eyepæ næænte baī badīnque mōnitō tōmēnāni nāni tæi mænōincō bæ tate baī cædinque wæætedō wæætē nāni godō ānewēnō ante wido cæte baī cæmōnīpa. ⁵ Wængonguī ingante pōnēnāmaī ingæimpa, ante nē pōnēwēnāni inte ængæ gantīdīnque tōmēnāni iñōmō, Wadāni tōmānāni adobaī Wængonguī ingante pōnēnāmaī incædānīmpa, ante cædinque babæ wapiticæ cædānīpa. Mānīi babæ wapiticæ nāni cædōnō ante mōnitō wæætē bæ tate wido cæmōnīpa. Edæ, Codito ingante mōnō eñengæimpa, ante nō apænēmōni eñēnīnque wadāni idiquibæ pōnēwēnāni iñōnāni mōnitō wæætē mānīnō nāni

pönewönö tömänö ö ænte bai wido cæmönipa.
⁶ Ayæ mīnitō ædæmō nē ēñente cæmīni bamīni ate
 adocanque incæ ēñēnāmaī cæcā adinque mōnitō
 wæætē tömengā ingante do panguīmōni imōnipa.

⁷ Æbänö i, ante edonque ongö abaimīnipa.
 Pancamīniya, Botö näwangä Codito nempo
 quëwëmo imopa, ante pönēmīnitawo. Mīnitō
 mänōmaī pönēmīni inte godōmenque iīmaī ante
 pönenguēnēmīni imīnipa. Botö Codito nempo
 quëwëmo imo bai Pabodoidi adobaī Codito nempo
 quëwënāni inānipa, ante näwangä impa, ante
 pönenguēnēmīni imīnipa. ⁸ Iñæmpa Wængonguī
 mōnitō imōnite ānīnque, Mīnitō nē āmīni badinque
 coodintoidi inānite bæ tate wido cædāmaī
 incæmīnimpa. Wæætē ædæmō āmīni ēñēnīnque
 coodintoidi wæætē oncö tæi mænonte bai
 gongæncædānimpa, ante cæedāni, ante Wængonguī
 pönö angä ēñēnīnque mōnitō nē āmōni batamōnipa.
 Iñinque botö, Nē āmo inte nāmā tocæboimpa, ante
 tedebo incæte guīñēnedāmaī tedecæboimpa.

⁹ Botö, Cadota ante botö yewæmōinta adinque
 mīnitō guīñente wæcæmīnimpa, ante dicæ āmogaa.
¹⁰ Pancamīniya, Pabodo tæi piñængōngā bai
 inte cadota ante yewæmōnīnque nanguī angä
 awædö, ante wæmīnipa. Wæætē edæ adocā incæ
 mōnitō weca ponte ongōnīnque edæ aquīi ingā
 amōnipa. Tömengā nänö tedepāmo önömāmoque
 bai impa, ante pönēmīni awædö. ¹¹ Iñæmpa, Tæi
 piñæmōni inte cadota ante nē yewæmōmōni
 incæ mōnitō adomōni inte mīnitō weca ponte
 ongōnīnque adobaī tæi piñænte cæcæmōnimpa,
 āmo ēñēmaimīnipa.

12 Pancadäniya nämä incæ, Waëmö pöni ïmopa, ante tededäni incæte tömënäni nämä näni tede bai mönitö ædö cæte adobainö ante tedequimönii. Tömënäni ïñömö, Ægancadö waa cæbo eyepæ inguüi, ante nämä näni cægancaque ante adinque edæ, Eyepæ cætabopa, ante pönëwënänipa. Tömënäni näni cædö ante, Waa cætawo, ante tee mancæte ante, Do botö cædinö bai adobai cæbopa, ante adinque, Eyepæ impa, ante pönëwënänipa. Mänömaï nämä näni pönëwënonque ante cædinque tömënäni ëñënamäi inte oda cæte cædänipa.

13 Mönitö guiquënë, ïngancaque goedäni, ante Wængonguï nänö angancaque cöwë gomönipa. ïnque tömengä, Coodintoidi ganca godinque apæneedäni, angä ëñëninque mönitö do gote apænedinque, Mäningancaque waa cæmönipa, ante nämä waa ate tedemönipa. Godömenque ante tededämäi ïmönipa. 14 Minitö ganca pönämäi inte bai mönitö, Coodintoidi weca gote do cætamönipa, ante tedemöni bai babæ wapiticæ incædönimpa. Incæte minitö ganca do pöninque Codito ingantedö ante mönitö watapæ möni ëñënö ante apænetamönipa. ïnque edæ, Mäninganca cætamönipa, ante mäninque ante tedemönipa. 15 Ayæ wadäni näni cædinö ante adinque mönitö, Tömëmöni cædinö impa, ante änämäi ïmönipa. Wæætë minitö godömenque godömenque wede pönëñömini mönitö wæætë adodö minitö weca ponte quëwëninque godömenque gomonga cæyömöni mönö watapæ bacæimpa, ante pönëmönipa. 16 Ayæ minitö weca ïnque cædinque mönitö godömenque gomonga godinque mönö Codito ingantedö ante watapæ möni ëñënö ante

apænecæmönimpa, ante pönëmönipa. Mänömaï cædinqe mönitö wacä nänö cædiñömö ante, Mönitö mäniñömö cætamönipa, ante tededämaï incæmönimpa.

¹⁷ Æcänö, Botö waëmö pönï inömo inte waa cæbopa, ante toinäna tömengä wæætë, Mönö Awënë waëmö pönï inongä inte pönö waa cæcampa, ante toquënegä ingampa. ¹⁸ Edæ, Waëmö inömo ïmopa, ante nämä änongä ingante Wængonguï waa adämaï ingampa. Wæætë, Ìingä waëmö inongä ingampa, ante mönö Awënë nänö änongä ingante ante Wængonguï wæætë waa acampa.

11

Wængonguï beyæ, ante pancadäniya babæ apænedänipa

¹ Nöwo botö adodeque önonque tedete bai yewæmömo adinqe minitö ee amini ïninqe botö waa tobaïmopa. Wadö ämo, Minitö ee ayömini edæ botö önonque tedete bai do yewæmömopa. Ìninqe iïmaï ante odömoncæte ante yewæmömoï aedäni. ² Wængonguï wææ gompcä bai botö adobai minitö beyæ ante wææ gompote ämopa. Minitö baquécä mönämaingä bai ïñöminite Codito ængä beyænque mini pönencabo tömengä nempo nö cæte quëwencæminimpa, ante pædæ godoncæte ante cædinqe botö tömengä adocanque ingante, Bitö quinäni inänite æe, antabopa. ³ Minitö nöingä cædinqe wacä miñæ godämaï inte Codito ingante waadete pönëmini incæte botö, Minitö oda cæmini wæcæ wæ, ante guñente wæbopa. Eba wodi ingante Tæntæbo nanguï ëñengä inte babæ

cædinqe apæ necä eñëninque tömengä nänö oda cægaï bai minitö wii adobai oda cæcæminimpa, ante botö wææ ante apænebopa.

⁴ Mönitö, Itota ingante pönengæimpa, ante do apænemöni eñëminitapa. Incæte wacä minitö weca pöninque näwä Itota ingante apænedämaï inte, Wacä Itota ingante pönëedäni, ante babæ apæneyongante minitö edæ eñëë cömïni awædö. Adobai Wængonguï Önöwoca do ængaimïni iñömïnite wacä önöwoca pö guiyongante minitö ee æmïni guicä awædö. Ayæ wadäni mönö Codito ingante ante apænedämaï inäni inte, Wacä ængä beyæ quëwengæimpa, ante babæ apæneyönäni minitö edæ eñëë cömïni awædö.

⁵ Mänömainö ante në tededäni iñömö nämä ante pönëninque, Në gode ämöni inte mönitö ñænæmöni pöni imönipa, ante edæ babæ anewënanipa. Tömënanï näwangä ñænænäni inäni bai botö dicæ wädämo inguënëmogaa, ante pönëmopa. ⁶ Botö æbänö tedeboo, ante eñëninque minitö iñömö, Önönepämoque tedecampa, ante pïiminitawo. Incæte botö ædæmö adïmo inte në eñënimo inte apænebopa. Pabodo mänömaï inongä inte apæ necampa, ante acæminimpa, ante mönitö cöwë minitö imïnite edonque odömömöni aminitapa.

⁷ Minitö imïnite ængö cæte bai cæcæte ante botö Wængonguï ingantedö ante watapæ apænebo beyæ ænämaï intabopa. Mänömaï ænämaï inte botö nämä edæ piinte bai cædinqe dicæ wiwa cætabogaa. ⁸ Codito ingante godongämæ näni pönencabo wayömö näni cabo wayömö näni cabo da pönönäni ö æninque botö mänintaque godonte ænte quëwëninque minitö beyæ cætabopa. ⁹ Ayæ

mīnitō weca ongōninque botō quīēmē æinente wæbo incæ edæ waa atabopa. Wadāni edæ mōnō tōniñadāni incæ Māatedōniabæ quēwente pōninque tōmēnāni botō ænguēnēnō ante eyepæ pōnōnāni æntabopa. Īninque coodintoidi botō ānō beyæ wædāmaī incædānimpa, ante wææ cædinque botō iñōmō edæ, Pōnōmīni æmoedāni, ante cōwē ānāmaī intabopa. Ayæ iīncayæ ate cōwē ānāmaī incæboimpa. ¹⁰ Mōnō Codito nō nānō apænedō ante ēñente entawēmo inte āmopa. Botō, Mānōmaī cædinque waa cæbopa, ante cōwē edæ tedeyōmote mīnitō Acayabæ quēwēmīni inte edæ wææ cædāmaī incæmīnimpa. ¹¹ Quīnante mānōmaī ante tedeboī. Mīnitō iīmīnite waadedāmaī inte mānōmaī ante tedeboī. Īñæmpa botō æbānō mīnitō iīmīnite waadete pōnēmoo, ante do againgā inte Wængonguī tōmengā ancæcāimpa.

¹² Wadāni guiquēnē, Mōnitō Codito nānō nē godongaīmōni iīmōnipa, ante nē ānāni guiquēnē, Æbānō cæte odōmōmōni adinque wadāni Pabodoidi iñānite waa adō baī mōnitō iīmōnite adobaī waa acædānimpa, ante wædānipa. Īninque botō iñōmō, Īināni mānōmainō ante odōmōnāmaī incædānimpa, ante mānōmaī tedete wææ cæbo inte edæ cōwē godōmenque wææ cæcæboimpa. ¹³ Tōmēnāni iñōmō edæ, Wadāni oda cæcædānimpa, ante awēmō cædāni iñānipa. Mōnō Codito tōmēnāni iñānite da godōnāmaī ingā incæte tōmēnāni iñōmō edæ, Codito nānō da godongaīmōni iīmōnipa, ante babæ apænedānipa. Ayæ edæ mōnitō Codito nānō da godongaīmōni mōni ēmōnō baī ōnōmoque ēmōninque babæ cædānipa. ¹⁴ Mīnitō, Tōmēnāni quīnante wacā baī ēmōnāni, ante

wæmīnitawo. Īñæmpa tōmēnāni awēnē Tatāna incæ babæ cædinque Wængonguī anquedoidi ñāō nāni ēmōnō bai ñāō ēmonte bai ēmongampa. ¹⁵ Īnīnque Tatāna beyæ nē cædāni ĩñōmō tōmēnāni awēnē Tatāna nānō babæ cædō bai adobai babæ cædinque, Nē nō Cædongā ingante nē cæmōni ĩmōnīpa, ante ōnōmoque ēmōnānīpa. Īnīnque tōmēnāni nē ōnōmoque ēmōnāni inte ōnonque ēwente baquinānidō anguēnē.

Ēbānō caate wæboo, ante Pabodo yewæmongampa

¹⁶ Botō ñōwo adodō ante yewæmōmopa. Mīnitō, Pabodo ocai ōmædæcacā ĩnongā inte ōnonque tedecampa, āmīnitawo. Mānōmaīnō ante ānāmaī ĩmæwedāni. Incæte wacā ocai ōmædæcacā tedeyongante mīnitō ee amīni tedecā bai botō adobai ocai ōmædæcabo inte bai, Nāmā waa cæbo ĩmopa, ante adodeque tedebo ĩnīnque ee amīni tedeboedāni. ¹⁷ Botō ñōwo mānōmaī nāmā waa ate bai tedete yewæmōnīnque mōnō Awēnē nānō āmaī wīi yewæmōmopa. Wæætē ocai ōmædæcacā mā nānō pōnente tede bai adobai ōnonque tedete bai yewæmōmopa. ¹⁸ Pancadāniya nanguī ĩnāni incæ, Mōnitō nāmā waa cæmōnīpa, ante edæ inguipogaque quēwēnāni tededāni bai adobai tededānīpa. Tōmēnāni mānōmaī tededāni ĩnīnque botō adobai, Nāmā waa cæbopa, ante tedecæboīmpa. ¹⁹ Nē ēñēmōni ĩmōnīpa, ante nē amīni inte mīnitō ĩñōmō ocai ōmædæcadāni ōnonque tedeyōnānite ee ēñēē cōmīnīpa tōō. ²⁰ Wacā edæ mīnitō ĩmīnite bæi ongongā wædinque mīnitō tōmengā ingante ee nē cæmīni bawēmīni awædō. Wacā babæ wapiticæ cædinque mīnitō quī inguēnē

incæ ö ængä incæte mīnitö edæ ee amīnipa. Wacä mīnitö awēnē bai nāmā ængö cæte angä incæ ee eñēmīnipa. Wacä mīnitö imīnite pōnō tamongä incæte mīnitö ee ate wæmīni awædö. ²¹ Botö wæætē aquīmo inte, Tömēnāni nāni nanguī cædö bai ædö cæte cæquīmo, ante botö guingo imonguinque önonque tedebo pa töö.

Tömēnāni nāmanque waa adinque edæ guīñēnāmaī inte tededānitawo. Botö adobai nāmanque waa adinque edæ guīñēnāmaī inte tedecæboimpa. Incæte mănōmaī tededinque botö önonque badete tote bai tedebo pa. ²² Tömēnāni guiquēnē ebedeoidi inānitawo, ante pōnēmīni. Botö iñōmō edæ tömēnāni nāni imāi adobo imopa. Tömēnāni idægoidi inānitawo. Edæ botö tömēnāni nāni imāi adobo imopa. Tömēnāni Abadäo wodi pæināni inānitawo. Edæ botö tömēnāni nāni inö bai adobo Abadäo wodi pæimo imopa. ²³ Mönö Codito beyæ nē cædönāni inānipa, ante pōnēmīni. Botö edæ tömēnāni nāni imāi inte edæ gomonga imopa. Incæte mănōmaīnō ante tededinque botö ocai ömædæcacä bai inte önonque tedebo pa. Tömēnāni inānite adopoque adopoque wædænque cæyönāni botö godömenque nanguī cægaboimpa. Tömēnāni inānite wædænque tee mönedāni wæyönāni botö imote godömenque wæætē wæætē tee mönedāni wægaboimpa. Tömēnāni inānite wædænque tæi pānāni wæyönāni botö imote godömenque nanguī tæi pānāni wægaboimpa. Ayæ botö wæætē wæætē wodo wængaboimpa.

²⁴ Oodeoidi æmontaimenca wodo coadenta ganca adoyedē nāni cōwē tæi päimpoga botö imote adoyedē mānimpoga tæi tæi pāninque

önompo æmæmpogoncaque wæætë adopoga
 adopoga tæi tæi pänäni wægaboimpa. ²⁵ Ayæ
 cantaca mempoga go adopoque botö imote tæi
 tæi pänäni wægaboimpa. Ayæ adopoque botö
 imote dicaca tacadäni wangæ wængaboimpa. Ayæ
 wipodë wogaa godinque mempoga go adopoque
 wipo tente tobæmpo wægaboimpa. Edæ wii
 eyepæ gote botö tömäa itädë tömäa woyowotæ
 tæcæpæno pönï wæwogaboimpa. ²⁶ Wayömo
 wayömo botö ancaa godinque wætabopa. Önö
 æpæmpo wodo bete wæntabopa. Në ö ænäni
 incæ botö guidënäni incæ wadäni incæ wodo
 wænönäni wæmo adinque botö wænguinque ante
 wægaboimpa. Ayæ tömënäni nani quëwëñömö
 quëwëninque, Önomæca quëwëninque, gäwapæno
 owodinque botö wænguinque ante wægaboimpa.
 Ayæ wadäni incæ, Mönö pönencabo imompä, ante
 babæ änäni adinque botö iñömö edæ, Babæ
 cädäni wæncæ wæ, ante wægaboï aedäni. ²⁷ Botö
 pancaönaa tömäa woyowotæ müimo inte nanguï
 cædinque wægaboimpa. Tepæ pancaönaa gæwænte
 wægaboimpa. Pancaönaa cængui dæ ä ate gue
 ænente wægaboimpa. Edæ æpogamë pönï cænämäi
 inte wægaboimpa. Pancayedëña botö weocoo
 ömaabo inte yoguite wægaboimpa.

²⁸ Mänömaï wædömo inte botö, Codito ingante
 godongämæ nani pönencabo tömancabodäniya nani
 wædö ante æbänö cæquimoo, ante wædinque iimö
 iñö iimö iñö nanguï cæbopa. ²⁹ Edæ wacä aquingä
 inte wæcä ininque botö adobai aquüimo inte bai
 wæbopa. Ayæ, Wënæ wënæ cæe, änäni ëñëninque
 adocanque oda cæcä ëñente wædinque botö ædö

cæte wæwēnāmaī inguīmoo.

³⁰ Īninqe, Nāmā tæēmō inte cæbopa, ante ted-
edāmaī incæboimpa. Wæætē, Æbānō aquīimo inte
cæbopa, ante acædānimpā, ante botō mǎnīnonque
ante tedecæboimpa. ³¹ Wængonguī ĩñōmō mōnō
Awēnē Itota Wæmpocā ĩnongā inte edæ tōmengā
adocā ĩñōmō Itota Wængonguī ingampa. Tōmengā
waēmō pōnī ĩnongā inte cōwē waa pōnī cæcampa,
ante mōnō tōmengā ingante cōwē apænecæimpā.
Tōmengā ĩñōmō edæ, Pabodo nō angampa, ante
do ēñengampa. ³² Ayæ ĩmaī cædāni wægaboimpa.
Adeto Tidiabæ awēnē nānō ĩnōñedē mǎnīñedē
botō ĩmote bæi ongoncæte ante cædinque tōmengā
nānō ēmīñængā wædænque awēnē ĩñōmō ĩmaī
cæcantapa. Tōmengā wadāni ĩnānite angā ēñēninqe
tōmēnāni wæætē Daāmaco ĩñōmō tōmēnāni nāni
wīni wææ cæincō boyæ yabædemō gāānē wānō
cōññōnāni, ³³ botō tōnō cædāni guiquēnē Daāmaco
nāni wīni wææ cæincō boyæ cæimpiticæ ĩnō otodē
ñā cædete botō ĩmote pædæ wæænñōnāni ti wææ
aamō cæte wodii wīnongaboimpa.

12

Pabodo, ĩmaī wūimonte baī atabopa, angampa

¹ Ōnonque tedebo incæte botō, Waa cætabopa,
ante cōwē tedequēnēmo ĩmopa. Īninqe botō ñōwo
edæ, Wūimonte baī ayōmo mōnō awēnē mā pōnī
odōmongā atabopa, ante yewæmoncæboimpa.
Ayæ tōmengā, Æbānō ĩ, ante edonque pōnī nānō
odōmōnōnō ante godōmenque yewæmoncæ
cæbopa. ² Codito nempo nē quēwēmo ĩñōmote
Wængonguī do catodote wadepo ĩñonte botō ĩmote

öönædē wænōmēnæcaönæ mæicā æigaboimpa. Incæte wacā æicā ate bai nāmā incæ agaboimpa. Wabänō önōwocaque inte æigaboī. Īntai ēñate wabänō inque inte æigaboī, ante botō adāmaī ĩmopa. Wængonguinque nē ænte mæigaingā inte tōmenganque ēñengampa. ³ Edæ baō ēñate æibo incæ baō ōmaabo inte æibo incæ Wængonguinque ēñēñongā botō, Īimaī ingatimpa, ante māninque ēñēmopa. ⁴ Waēmōnædē tōmengā ōmæ ĩñōmō Wængonguī ænte mæicā æigaboimpa. Māniñōmō waa pōni apænedāni ēñēmo incæte tōmengā, Īñōmō mōni apænedō ante mīni waocabo apænedāmaī incæmīnimpa, ante wææ angā ēñēninque botō waobo inte ædō cæte apænequimoo.

⁵ Īninque wacā mænōmaī öönædē æite ēñengā ĩninque botō, Tōmengā waa pōni cæcampa, ante do apænebaīmopa. Wæætē nāmā botō waa cædönō ante apænedāmaī incæboimpa. Incæte, Tōmēmo aquīmo inte ōnonque cætabopa, ante māniñonque ante botō nāmā waa ate bai apænecæboimpa. ⁶ Waa cægaboimpa, ante tedebo ĩninque botō wīi ocai ōmæcabo inte edæ tedebaīmopa. Īñæmpa nāwangā waa cægāimo ĩnōmo inte botō nō ante edæ tedebaīmopa. Incæte botō wædænque apænete pönōmenque cæyōmote æcāmenque incæ, Pabodo godōmenque waa pōni cæcampa, ante änāmaī incæcāimpa, ante wææ cædinque botō waa cægāinō ante tededāmaī inte edæ pæ wēēnebopa.

⁷ Wængonguī mā nānō odōmongāinō æbänō waa pōni ingateī, ante wadāni adāmaī ĩñōnāni botō adoboque atabopa. Īninque, Pabodo, Botō

adoboque nē agāimo ĩmopa, ante nāmā waa adāmaī incæcāimpa, ante wææ cædinque Wængonguī angā ate Tatāna botō ĩmote pōnō da boo codongate ocæ ocæ coingā bai cæcā wætabopa. ⁸ Mānōmaī cæcā wædinque botō mempoga go adopoque Wængonguī Awēnē ingante apænedinque, Botō daa cogate bai wæyōmote o tongaate bai cæbi quēwēmoē, ante nanguī ante wætabopa. ⁹ Ca wæyōmote mōnō Awēnē wæætē, “Nē aquīi pōni ĩnāni ĩñōnānite botō tæi piñæmāmo eyepæ pōni pōnōmo æninqe tōmēnānique wæætē tæi piñænte entawencædānimpā. ĩninqe bitō nē aquīimi ĩmi beyænque botō waadete pōnō cædō ĩñōmō edæ eyepæ pōni impā.”

ĩninqe mōnō Codito nānō tæi piñænte cæpāmo ænte entawencæte ante cædinque botō ĩñōmō edæ, Nāmā aquīimo inte botō wædinō beyæ ante botō nāmā waa ate tobopa, ante tededinque godōmenque tocæboimpā. ¹⁰ Æyedēnō aquīimo ĩmoī māniñedē edæ tæi ewocaboimpā. Mānōmaī beyæ aquīimo inte botō Codito beyænque nanguī tobopa. Badete tote piinte cædāni wæbo incæte botō piyænē cædinque tobopa. Ancaa nanguī caate wædinque nangæ babo incæ, togænte pānāni wæbo incæ, Ædō cæte quēwenguīmoō, ante wæbo incæ mānīnō tōmāā beyæ wædōmo inte botō Codito beyænque ante piyænē cæte nanguī tobopa.

Coodintoidi æbāmē cædāni, ante wæbopa, Pabodo angā

¹¹ Ocai ōmædæcacā ingā bai Pabodo ōnonque tedete yewæmongampa, ante pōnēmīnitawo. ĩñæmpa tōmēmīni botō beyæ wææ apænedāmaī

imīni beyænque botō tōmēmo nāmā wææ cæcæte ante cædinque mǎnōmaī tedete yewæmōmopa. Wadāni nē gode ānāni guiquēnē nāmā nāni waa acabo inānīpa. Incæte tōmēnāni nāwangā ñænænāni ināni ininque botō iñōmō dicæ wædāmo imogaa. Ininque mīnitō tōmēmīni, Pabodo waa cæcā ingampa, ante tedequēnēmīni imīnīpa tōō.

¹² Wacā mīnitō weca pōnīnque æbānō cæcā ate mīnitō, ĩngā iñōmō mōnō Codito nānō nē da godongaingā ingampa, ante eñēmīnīi. ĩlmaī impa. Tōmengā, Eñencæmīnīmpa, ante mā pōnī cæcā ate do eñēmīnīpa. Tōmengā bamōnengæ nangūi odōmongā ate eñēmīnīpa. Wadāni cædāmaī iñōnāni tōmengā tæī piñænte cæcā ate wædinque mīnitō wæætē edæ, Codito nānō nē da godongaingā ingampa, ante do eñēmīnīpa. Ininque botō mīnitō weca quēwēnīnque edæ Codito nānō nē da godongaingā mā cæte nāni odōmōnī baī adobaī odōmōnīnque edæ wæntædāmaī inte ee cæbo abaīmīnīpa. ¹³ Ininque wadāni Codito ingante nāni godongāmæ pōnencabo inānite waa cædinque botō mīnitō imīnite dicæ pōnōmenque cætabogaa. Wabānō mīnitō imīnite, Pōnōmīni æmoedāni, ante ānāmaī inte botō mīnitō imīnite wīwa cæbopææ.

¹⁴ Botō do mīnitō weca mempoga pōnīmo inte ñōwo wæætē poncæ cæbopa. Pōnīnque botō mīnitō māincoo ante ānāmaī incæboimpā. Wæætē, Mīnitō botō wēmīni bacæmīnīmpa, ante cæbopa. Wēñænāni tōmēnāni mæmpoidi beyæ ante dicæ godonguēnēnāni ināniyaa. Wæætē edæ mæmpoidi iñōmō wēñænāni beyæ ante nē godonguēnēnāni inānīpa. ¹⁵ Ininque, Mīnitō quēwencæmīnīmpa,

ante botō māincoo tōmancoo godōninque waa tocæboimpa. Ayæ, Minitō quēwencæminimpa, ante cæte wæmo ininque waa tobaïmopa. Botō mǎnōmaï mīnitō imīnite gomonga waadete pōnēmo ininque mīnitō wæætē botō imote pōnōmenque waadete pōnēmīni imīnitawo.

¹⁶ Incæte edæ idæwaa ämopa. Minitō māincoo ante botō änāmaï intabopa. Incæte mīnitō, Pabodo nē wēnæ wēnæ pōnengā inte awēmō æncæte ante babæ cæcampa, ante pōnēwēmīni awædō. ¹⁷ Wadāni inānite mīnitō weca da godōninque botō awēmō æntawo, ante pōnēmīnitawo. ¹⁸ Tito ingante, Coodintoidi weca ate pōe, nanguï äninque botō wacā mōnō tōnīñacā tōnō tōmengā tōnō da godōmo guēa godatapa. Ininque Tito mīnitō weca pōninque dicæ wiwa cædinque māincoo ö ængantawogaa. Inæmpa tōmengā tōnō botō guēa äawocaque bai ewocamōna inte mōnatō guēa cægōmōna adinque mīnitō adāmaï inte bai tedewēmīni awædō.

¹⁹ Minitō, Pabodoidi nāmā wææ cæcæte ante apænedānīpa, ante pōnēmīni awædō. Inæmpa mōnō Codito nempo quēwēnōmo inte mōnitō Wængonguï ayongante apænetamōnīpa. Edæ, Botō nē waademīni imīni inte mīnitō tæï piñænte bacæminimpa, ante cædinque mōnitō mǎnōmainō ante apænetamōnīpa. ²⁰ Botō iñmō edæ mīnitō waa cæmīni acæte ante ponte ayōmo mīnitō wadō cæmīni bai botō nanguï wæcædōmoimpa, ante guñente wæbopa. Ayæ mīnitō wæætē, Pabodo waa cæcæte ante pongampa, ante pōnēñōmīni botō wadō cæbo bai mīnitō nanguï wæcædōminimpa, ante pōnente wædinque botō, Mōnō mǎnōmaï

wædämaï ingæimpa, ante wææ cæcæte ante cæbopa. Edæ mīnitō wæætedō wææte pīinte amīnitawo. Wacā ingante waa cædāni wædinque mīnitō godō pīinte amīnitawo. Īñontobæ ænguï bamīnitawo. Nāmanque pōnente cæmīnitawo. Wacā ingante pīinique godō babæ ante tedewēmīnitawo. Godō wæntaa wæntaa ämīnitawo. Nāmā waa adinque cæmīnitawo. Wīī ēñente cædinque mīnitō Yæ yæ tedemīnitawo. Māninō tōmānō wabānō cæmīnii, ante guīñente wædinque botō mānōmainō ante edæ yewæmontabopa.

21 Īinque botō ponte ayōmo pancamīniya wēēñēñedē mīni cægaï baï ñōwo adobaï cæmīni adinque botō guingo imonte wæconguēñemo ante awædō. Edæ pancamīniya wēēñēñedē wentamō mīni mongæñō ee mongæmīni adinque botō Ca ca wæbaïmopa. Wēēñēñedē mīni godō towengainō ayæ towēmīni intawo. Wēēñēñedē ēñēñamaï inte mīni wīwa cædīnō ayæ cæmīni intawo. Edæ wentamō mongæmīni inte guingo imōnāmaï imīni inte pancamīniya Wængonguï gāmæñō ocæ ēmænte pōnāmaï imīnīpa, ante guīñente wæbopa.

13

Idæwaa māninque yewæmōmopa, ante

1 Botō mīnitō weca mempoga do pongaïmo inte ñōwo wææte poncæ cæbopa. Īīmaï ante do yewæmongatimpa. Nō nō æbānō cætimpā, ante ēñencæte ante waoda mēnaa incæ mengāa go adocanque incæ nē adīnāni inte adodō ante apænedāni ēñēninque do apænte angæimpa, ante nāni yewæmongainō ante ēñēninque cæcæboimpa.

² Wēenēñedē wēnæ wēnæ cædināni tönō wadāni tōmānāni inānite botō mīnitō weca doyedē pōninque, Ämo ēñēedāni, ante wææ āninque ñōwo wæætē wayōmō ongōninque adodō ante wææ ante yewæmōmopa. Ayæ ate wæætē mīnitō weca ponte ongōninque tōmanga apænte āninque adodāni inānite ata cæpodāmaï incæboimpa.

³ Pabodo wabānō mōnō Codito tönō godongāmæ cæte apænecää, ante wæmīnitawo. Māninō ante mīni wædō ante edæ, Nāwangā impa, ante odōmoncæte ante botō mānōmaï apænte ancæboimpa. Mōnō Codito incæ botō tönō godongāmæ nē cædongā iñōmō tōmengā iñōmō aquīngā ināmaï inte mīnitō imīnite apænte angā abaīmīnipa. Tōmengā iñōmō nanguï tæï piñænongā inte mīnitō weca cæcā apa ānewēmīnii.

⁴ Nāwangā impa. Mōnō Codito adocā incæ aquīngā bai inte cæyongante waodāni wæætē ñænquedimæ cæte māo timpodāni wængacāimpa. Incæte Wængonguï nānō tæï piñænō beyænque adocā ñāni ömæmonte quëwengampa. Mōnitō adobai tōmengā nempo quëwëninque aquïmōni inte edæ Wængonguï nānō tæï piñænō beyænque mōnō Codito tönō godongāmæ quëwëninque mīnitō beyæ ante cæquïmōni imōnipa.

⁵ Mīnitō tōmēmīni iñōmō, Æbānō wede pōnēmo imoo, ante nāmā waa aedāni. Mīni cædinō adinque, Æbānō nōingā cæbo imoo, ante aedāni. Iñæmpa, Itota Codito ingante entawēmompa, ante ēñēnāmaï imīnitawo. Wabānō mīnitō pancamīniya nāmā adinque, Botō nōingā cædāmaïmo inte edæ wede pōnēnāmaïmo inte awædō, ante ēñencæte ante aquënēmīni imīnipa. ⁶ Ayæ nāmā mīni a bai mōnitō

imönite adobaï apænte adinque mīnitō, Pabodoidi guiquēnē nōingā cædōnāni inte nē wede pōnēnāni inānipa, ante edonque amīni waa tobaïmopa. ⁷ Mīnitō beyæ ante mōnitō Wængonguï ingante apænedinque, Coodintoidi cōwē wēnæ wēnæ cædāmaï incædānimpa, ante apænemōnipa. Incæte mōnitō, Mīnitō wēnæ wēnæ cædāmaï imīni ate wadāni, Pabodoidi ædæmō cædāni beyænque impa, ante mōnitō imönite waa acædānimpa, ante wīi cæmōnipa. Wæætē wadāni, Pabodoidi wīi eyepæ cædānipa, ante pīinte ānāni incæte mīnitō wæætē nōingā cæcæmīnimpa, ante mōnitō mānīnonque ante cōwē cæmōnipa.

⁸ Edæ Wængonguï nōingā nānō ānō ante nē cæmōni inte mōnitō adode ante ædō cæte wido cæquimōnii. ⁹ Inique mōnitō æyedēmē aquīimōni iñomōni mīnitō wæætē tæi piñænte cæmīni adinque mōnitō nanguï tomōnipa. Mīnitō beyæ edæ Wængonguï ingante apænedinque mōnitō, Coodintoidi eyepæ entawēninque picænāni baï nō cæcædānimpa, ante apænemōnipa. ¹⁰ Botō imote apænedinque Wængonguï, Bitō wadāni inānite bæ tadāmaï inte tæi mænonte baï pōnō cæcæbiimpa, ante pōnō cæcā ate botō tæi piñæmo badinque nē āmo batabopa. Nē āmo imo incæte botō mīnitō weca ponte ayōmo wīwa cæmīni adinque pīinte panguēnēmo ināmaï incæboimpa, ante wææ cædinque botō ñowo wayōmō quēwēninque, Nāmā apænte ædāni, ante wææ yewæmōmopa.

¹¹ Iñānāni, mānīnque ante ñowo yewæmōmopa. Mīnitō eyepæ entawēninque, Mōnō picænāni baï badinque nō cæcæimpa, ante nanguï cæedāni, āmopa. Wæntædāmaï inte tæi piñænte cæedāni.

Mini cabo incæ adoyömö pönëninque gänë pönente quëwëedäni. Wængonguï incæ në Waadecä inte në gänë entawengä inte mīnitō tönō cōwë quëwencæcäimpa, ämopa. ¹² Mīni cabo incæ godongämæ pō bee tēninque waadete pönente waa apæneedäni. ¹³ Wængonguï quīnāni eyequeï quëwënāni iñömō, Mīnitō waa quëwencæmīnimpa, ante apænedäni eñente yewæmōmopa.

¹⁴ Mīnitō tōmāmīni mōnō Awënë Itota Codito waadete nānō pōnō cægainō ante entawencæmīnimpa, ämopa. Mæmpo Wængonguï tōmengä nānō waadete pōnēnō ante entawencæmīnimpa, ämopa. Wængonguï Tæiyæ Waëmō Önōwoca tönō äawocaque bai ewocadinque tōmāmīni godongämæ waa quëwencæmīnimpa, ante botō Pabodobo māninque ante yewæmōmopa.

Wængonguï nänö Apænegainö
New Testament in Waorani (EC:auc:Waorani)

copyright © 2009 Wycliffe Bible Translators, Inc.

Language: Waorani

Translation by: Wycliffe Bible Translators, Inc.

Waorani [auc], Ecuador

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Waorani

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

9bedab5a-39ff-5163-a35b-8056cbbe8690